

## **Yesu Keliso yana HAWAVEMOGATALA Yoni gi'eno'itayena amanadi**

Hida buki Yoni Loma kabemani yadi aba'aiyogona himula ana egana Fatimo againe gimiyami tu gi'etoladina. Yesu lobameya gilaka-yo malamala 35 amine hihegedi tu Yoni gi'etoladi. Buki ana etoladi tovai-nadi Yesu ana tovetumagana ve'umagigi lakahina Loma kabemani nimadiya hinuhagana, ada Yoni nuwanuwana ase'asedi ginakivevatuna, kadu ginalu'ageyedi higa yadi atuvefa'ila againe hinafaiwala-mo'a.

Nagona Yoni Yesu Tauna gi'eno'itayena tu Yesu yana venuwa'ata ekelesiya seveni agaidiya ginogalina-ma gi'etoladina. Muliya eno'ita tulina tulina agaidiya gavadi gavadi aimo hinalakayemu-ma Yesu Yoni againe gihawavemogatalena, ada Yoni bukiya ide agaideya gihawavelevelena. Gavadi aimo ginalakayemu-ma Yesu gaitoma tulina tulina agaidiya giluvefosedi. Gaitomai-dina tufona gahetalahobuhobu amine ada adi nuwanuwa aimo ka'itahowahowana.

Atu buki ana nuwanuwa lakahina au mahamahali-mo'ena, higa Yaubada Kaiwabu Yesu Keliso againe Setani ahenao kadu tomiyababi gaveyao agaidiya hihawahegedi-ma matatabudi ginafaiwalahegehege-mo'edi yo ginaluyaweyaweli-vagahidi. Adi agolaufofola

hinanuhagani-yo Yaubada yana yo'ogaga lobama  
babi ivagudi agaidiya yadi wavemwamwala-  
vagata Yaubada buye hinamiyamiya-vagata.  
Buki dobona hidede amine.

Buki inubana kadu ekelesiya seveni adi lusiule.

1:1-8

Yoni Keliso gi'eno'itayena. 1:9-20

Keliso yana leta ekelesiya seveni agaidiya ma.

2:1-3:22

Buki uwa'uwana ana itava bulava seveni ma.

4:1-8:1

Tovenuwa'ata seveni yadi hiulega ana aiyuve

ma. 8:2-11:19

Wayo'o kadu kevakeva manimaninidiyao

adi'iselu ma. 12:1-13:18

Eno'ita tulina tulina ma. 14:1-15:8

Yaubada yana ila'a wanau'ana seveni ma. 16:1-

21

Babiloni ana lauyawela kadu kevakeva mani-

maninina, falofita ve'alololona, bana Setani

tauna adi agolaufofola ma. 17:1-20:10

To'alika adi vedewayauga-vagata ma. 20:11-15

Lobama babi Yelusalema ivagudi fa'ina. 21:1-

22:5

Yesu yana yewa'ela fa'ina. 22:6-21

### *Buki inubana fa'ina.*

<sup>1</sup> Hida buki ana gahegahe ma Yaubada Yesu  
Keliso givelena be higa gavadi gavadi tova  
kabisona makewa'e hinalakayemu, medema  
Yesu Keliso ide Yaubada ana agetoga agaideya  
ginahawavemogatalena. Yesu Keliso yana  
tovenuwa'ata lobama amine gi'iveninisena

be mena gaitomai-dina hinalakayemu-  
 ma iya Yoni gihawaveleveleku, iya Bana  
 ana agetoga amanadi. <sup>2</sup> Iya Yoni gaitoma  
 matatabuna ga'eno'itayena-ma agaimiya  
 omi ga'awatalatalainena. E, Yaubada yana  
 inuba gihawavemogatalena be Yesu Keliso  
 gi'awatalatalainena-ma fa'ina hida buki  
 againe gavenuwa'atami. <sup>3</sup> Gaitomai-dina  
 hinalakayemu-ma adi aituha gilurveda'ufo.  
 Mena aituha gilurveda'ufo fa'ina, hai kaliva hida  
 Yaubada yana venuwa'ata ana gahegahe yo'o  
 matadiya ginahawana, medema vemwamwala  
 ginanuhagana. Kadu kaliva gaveyao hida buki  
 ana hawa hinanogalina be ana nuwanuwa  
 hinavenogalena, medema vemwamwala  
 hinanuhagana.

*Yoni yana lusiule tovetumagana adi yo'o seveni  
 agaidiya.*

<sup>4-6</sup> Siule tobohiyakweyao omi tovetumagana  
 ami yo'o seveni Esiya ana fafaliya wamimiyami-  
 ma kalivai-mina. Iya Yoni hida yami leta  
 ga'etoladina be wana'itana. Yaubada kadu Bana  
 Alu'aluwana kadu Yesu Keliso hinanuwadogemi  
 kadu ase'ase mi hinakiveniwalovina. Bana  
 Yaubada ma tova moya'aina gimiyamiya-vagata,  
 e tuwaina gimiyami adamoya gimimiyami aimo  
 ginamiyami. Bana Yaubada Alu'aluwana ana  
 ita'ita vaita alu'aluwa seveni amine, ada Yaubada  
 yana didiga'u'u wamagigine himimiyami.  
 Bana Yesu Keliso ma to'awatalatalaina  
 dibudibumuhigina ada Bana Yaubada Natuna  
 anakaibe'u-mo'a alikeya gimadusivemididina,

ada kadu Bana'e babi ana tovehimeya moya'aidi adi Tokaiwabu.

Tu ide Bana Yesu Keliso kanahawadavadavana, fa'ina Bana agaideya ginuwanuwa ada dayagina gimadu-yo yada koyona ana laufata gisena be giyauda, kadu gikilakahida be yana abavehimeya againe ide Bana buye kavehivimeya, kadu yana Yaubada Tamana ana hawadavadava ana tofaisewa giseda. E, Yesu Keliso ana egana kanakilakahina ada yana kikaiwabu yana faiwala ginaduva-vagata tova inaga inaga keke ana abalauyabu. Ehe hidedemi. <sup>7</sup> Wese wa'ita, buhibuhi againe gi'ela'ela ada kaliva moya'aimo'eda kana'itana. E, badi hi'onana-ma taumadi hina'itana ada tomiyababi moya'aidi fafali tulina tulina agaidiya Bana tovematahiwadi gi'ela'ela fa'ina taudiyao fa'idiya hinatagilulaukuhi. Wona velemona ehe hidedemi.

<sup>8</sup> Yaubada Kaiwabu Bana'e tova moya'aina gimiyamiya-vagata, e tuwaina gimiyami adamoya gimimiyami aimo ginamiyami amanadi gigahe gigayo, “Iya inubane kadu tabone.” Hidedemi Yaubada Tofaiwala-mo'a gigahe.

*Yoni Keliso gi'eno'itayena.*

<sup>9</sup> Tu iya'eku kadu omi'iyao Yesu yana kaliva fa'ina, iya Yoni omi tawami, ada omi amine meda iya'eku vita lakahina Yesu fa'ine kanunuhagana kadu yana abavehimeya againe kamimiyami kadu yana veluga againe ka'atu'atuvefa'ila. Iya Yaubada bonana galumamalena kadu Yesu

fa'ine ga'awatalatalaina fa'ina hikive'aviku-yo yadi aba'aiyogona himula ana egana Fatimo againe hinaweku. <sup>10</sup> Fatimo gamiyami tu tafaloloya higa yada Kaiwabu yana aiyeta Bana Alu'aluwana giluvaiyeku-yo tamo hakwadi agona vaita hiulega agona amine wamulikuya ganogalina. <sup>11</sup> Bana gigahe'awafatafata gigayo, "Gavadi gavadi wana'itadi medema bukiya wana'etoladina be tovetumagana adi yo'o seveni agaidiya wana'iveninisena be hina'itana. Yo'oidina seveni yadi melala hidede amine, Efeso, Simena, Fegamo, Daiyataila, Sadisi, Filadelifiya, Leyodisiya." Hidedemi gigahe.

<sup>12</sup> Tu iya gahagavilaku higa hakwadi gigahegaheku ma gada'itana. Gahagavilaku-yo lamufa ana abasewadi seveni gola againe hibubudi-ma ga'itadi. <sup>13</sup> Ada lamufa ana abasewadi hinafadiya kaliva sa'eyana ga'itana, ana ita vaita Bana'e givekaliva-ma amine. Vaigau kikaiwabuna gi'osena higa ana aikeva tunugina akena gilifi-'owona, ada niniwala gola againe hibubuna-ma avaune gihifona. <sup>14</sup> U'una vaita galu'eguhi amine, au gikwayanuwanuwa howahowa amine kadu matana give'akinamanamalena vaita ai'ala'alata amine. <sup>15</sup> Kadu akena ve'akinamanamalena ana ita vaita kainumula yagoyagona ai'ala'alata lakahina againe hikabuna be give'akinamanamalena amine. Kadu agona vaita gufa lakahina gihobuhobu butuna amine. <sup>16</sup> Nimana i'atagine ibadibadi seveni gi'abidi ada fetu nigona luhei sinasinahina

awane giyemu. Magigina give'akinamanamalena vaita kauwana getadeya ana ita amine.

<sup>17</sup> Tu iya ga'itana againe Bana agene babiya gabe'u vaita ali'alikaku amine. Au nimana i'atagina agaikuya gisena gigaheku gigayo, “Keke unamatauta. Iya Abave'inuba kadu Abalauyabu.

<sup>18</sup> Iya Tomiya-vagata. Boi ga'alika tu u'ita, wayawaiku gamimiyami ada ganamiyamiya-vagata tova inaga inaga keke ana abalauyabu. Iya alika kadu to'alika yadi abaga ana tovehimeya, ana kihi Iya nimakuya.

<sup>19</sup> Au hidema fa'ina gavadi gavadi u'ita'itadi, medema una'etoladina. E, gavadi tova adamoya ahe gilakayemu kadu gavadi aimo tova mulina ginalakayemu, medema bukiya una'etoladina.

<sup>20</sup> Ibadibadi seveni i'atagikuya ga'abidi be u'itadi-ma kadu lamufa ana abasewadi gola againe hibubuna-ma adi nuwanuwa sevasevauyana hidede amine. Ibadibadi seveni au Yaubada yana tovenuwa'ata badi tovetumagana adi yo'o seveni hi'ita'itave'avididi. Ada lamufa ana abasewadi seveni au tovetumagana adi yo'o seveni.” Hidedemi gigahe.

## 2

*Keliso yana venuwa'ata Efeso tovetumagana*

*adi yo'o agaidiya.*

<sup>1</sup> Kadu Keliso gigaheku gigayo, “Fefe una'etoladina be Efeso againe ginana, higa bana Yaubada yana tovenuwa'ata tovetumagana adi

yo'o gi'ita'itave'avidima yana leta. Hidedemi yaku nuwanuwa una'etoladina badi miEfeso unagahedi unagayo,

Ibadibadi seveni i'atagikuya ga'abidi be lamufa ana abasewadi gola hinafadiya ganunudadana-ma Iya bonaku hidede amine.

<sup>2</sup> Yami dewa gahalamanena. Yami vediwe kadu yami atuvefa'ila gahalamanena. Kadu omi gahalamanemi, keke nuwanuwami badi tove'alololo kaliva koyodiyao buye wanamiyami, ada badi higahе vaita taudiyao afositolo tu keke velemodi ma ahe wagaluvaluvadi-yo wahalamanena badi hive'alololo. <sup>3</sup> Omi yaku kaliva fa'ina vita tulina tulina wanuhagana tu tova moya'aina wa'atu'atuefa'iledi be yami vetumagana againe keke wadagakowakowa, au wa'ase'asevatu.

<sup>4</sup> Mena yami dewa hagihagina tu huluva sa'eyana fa'ina ganadakeyemi. Boi nagona ve'ahawahawahega againe wamiyami, tu adamoya keke.

<sup>5</sup> Ve'ahawahawahega againe wa'ilova fa'ina, yami be'u lakahi-mo'ena. Au nuwami ginanunauyena be gavaiya'amine wabe'u ma wanahalamanena. Wanunuwawilami be boi nagona Iya fa'ikuya wanuwanuwa amine adamoya wanahuluhuluva. Ka'i mena yami koyona keke wanavenikohiyeni digo, agaimiya gana'ela yami lamufa ana abasewadi ganalemami be wanamiya-kawowo. <sup>6</sup> Tu yami dewa sa'eyana nuwaku gikiveyamumuna. Badi Nikolesi yana yo'o adi tufo yadi dewa koyo-mo'ena

wavenikohiyena, meda Iya gavenikohiyena amine.

<sup>7</sup> Omi watagami gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Hai kaliva Iya fa'ikuya yana atuvefa'ila againe ginafaiwala-mo'a, medema ganahawahegena be yawai-vagata ana ai againe gina'a. Ai-nadi Yaubada yana faha Faladaisi againe gimidimidi. Au hidedemi bonaku.”

*Keliso yana venuwa'ata Simena tovetumagana adi yo'o agaidiya.*

<sup>8</sup> Kadu'e Keliso gigaheku gigayo, “Fefe una'etoladina be Simena againe ginana, higa bana Yaubada yana tovenuwa'ata tovetumagana adi yo'o gi'ita'itave'avidi-ma yana leta. Hidedemi yaku nuwanuwa una'etoladina miSimena unagahedi unagayo,

Iya Abave'inuba kadu Abalauyabu. Boi ga'alika tu gamididi-havagi ma bonaku hidede amine. <sup>9</sup> Omi vita tulina tulina wanuhagana ma gahalamanena. Kadu gahalamanena omi koyokoyomiyao yami lokoloko hilemami tu Yaubada matane omi wakalivamiyao. Iya gahalamanena miYuda tufoidi hiveyaveyainemi. Badi kalivai-dina higahе vaita badi Yaubada yana yo'ogaga. Manuwa-abavehawala ana egana sinagogi againe hitafatafalolo nonogana yadi dewa againe kahalamanedi higa badi Setani yana



yo'o. <sup>10</sup> Tova kabisona ve'umagigi lakahina Iya fa'ikuya wanaruhagana tu keke wanamatauta. Gagahemi Setani yana vehimeya againe tufoimi deliya hinase mi be yami vetumagana hinagalualuvana, ada aiyeta teni agaidiya vita lakahina wanaruhagana be ginahavaina. Ka'i nibaikweyao hinakivekoyomi higa hidaluve'alikami, au ai'adi yami wavetumagana agaikuya wanaluve'avina-vagata ada yami atuvefa'ila fatana higa yawai-vagahimi ganavelemi.

<sup>11</sup> Omi watagami gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Hai kaliva Iya fa'ikuya yana atuvefa'ila againe ginafaiwala-mo'a, medema alika anavelu kaliva koyodiyao hinanuhagana-ma keke-mo'a ginakivekoyoni. Au hidedemi bonaku.”

*Keliso yana venuwa'ata Fegamo tovetumagana adi yo'o agaidiya.*

<sup>12</sup> Kadu'e Keliso gigaheku gigayo, “Fefe una'etoladina be Fegamo againe ginana, higa bana Yaubada yana tovenuwa'ata tovetumagana adi yo'o gi'ita'itave'avidima yana leta. Hidedemi yaku nuwanuwa una'etoladina miFegamo unagahedi unagayo,

Feto nigona luhei sinasinahina Iya awakuya giyemu-ma bonaku hidede amine. <sup>13</sup> Yami abamiyami gahalamanena. Mededei Setani

givehivhimeya kaliva moya'aidi bana againe hihawahegedi fa'ina. Atu omi'iyo ma Iya agaikuya aimo waluluve'avina, yami vetumagana keke wadahegeni. Mene yami melala Setani yana abavehimeya ma againe yaku tohawavemogatala ana egana Anidifasi Iya fa'ikuya gi'atuvefa'ila tu hiluve'alikana. Ana luve'alika wa'itana nonogana keke wadanuyabuyabuku.

<sup>14</sup> Wona velemona Iya fa'ikuya wa'atuvefa'ila tu yami dewa tufona fa'ina ganadakeyemi. Tuwai-mo'ena tovehimeya sa'eyana ana egana Belaki nuwanuwana miIsileli gina'ivehamumudi. Ada falofita sa'eyana ana egana Belamu bana Belaki miIsileli yadi bwavi ana eda givehawalena gigayo, Ka'i miIsileli Yaubada matane hinakoyo, au Yaubada gaviya againe keke ginavelugadi. Wananuwa'abiyedi be kevakeva mali kaliva kilumina agaidiya hihawadavadavayena-ma hina'ana, kadu udo tulina tulina agaidiya hinahawahegedi. Hidedemi Belamu givehawala-yo Belaki miIsileli mena koyonai-dina agaidiya givebe'udi be hibwavi. <sup>15</sup> Meda anafaiweya kaliva tufoimi yami yo'o agaimiya badi Nikolesi yana yo'o adi tufo yadi vehawala koyo-mo'ena himuliyena. <sup>16</sup> Mena dewai-dina gavenikohiyena fa'ina wananuwavilami. Ka'i keke wananuwavilami digo, tova kabi'ona agaimiya gana'ela badi kaliva koyodiyao feto awakuya giyemu-ma againe ganalugaviyadi.

<sup>17</sup> Omi watagami gavaimi Yaubada Alu'aluwana omi tovetumagana ami yo'oi-

mina agaimiya gigahegahe, medema wanavenogalena. Hai kaliva Iya fa'ikuya yana atuvefa'ila againe ginafaiwala-mo'a medema a'a sevasevauyana ana egana mana againe ganave'ana. Kadu kabala kwayakwayana ganavelena, kabalai-nadi againe egana kilukilumina ivaguna gidadauda, tu keke tamo hakwadi mena eganai-nadi gidahalamaneni au bana ganavelena-ma anakaibe ginahalamanena. Au hidedemi bonaku.”

*Keliso yana venuwa'ata Daiyataila tovetumagana*

*adi yo'o agaidiya.*

<sup>18</sup> Kadu'e Keliso gigaheku gigayo, “Fefe una'etoladina be Daiyataila againe ginana, higa bana Yaubada yana tovenuwa'ata tovetumagana adi yo'o gi'ita'itave'avidi-ma yana leta. Hidedemi yaku nuwanuwa una'etoladina miDaiyataila unagahedi unagayo,

Iya Yaubada Natuna matakua vaita ai'ala'alata amine kadu ageku give'akinamanamalena vaita kainumula yagoyagona kaliva hiyahayahana-ma amine ma bonaku hidede amine. <sup>19</sup> Yami dewa gahalamanena, yami ve'ahawahawahega kadu yami vetumagana, yami idibumuhiga kadu yami atuvefa'ila. Boi nagona yami hawahega agaikuya tufona tu adamoya lakahi-mo'ena.

<sup>20</sup> Mena yami dewa galukahihiyena-ma haghagina tu huluva sa'eyana fa'ina ganadakeyemi. Mene yami yo'o agaimiya kwamayoku sa'eyadi himimiyami, yadi dewa ma tuwaina Isileli tokaiwabu vavinena adi egana Yesebeli yadi dewa koyo-mo'ena amine. Wama kwamayoku koyodi taudi hivewagadi vaita badi Yaubada bonana ana to'awatalatalaina, ada yadi vehawala againe yaku tofaisewa tufoidi dewa koyona againe hinuwa'abiyedi. Hivehawaledi vaita udo tulina tulina kadu kevakeva kilumina agaidiya mali kaliva hihawadavadavayedi-ma ana'a au gilubodadi. Hidedemi yaku tofaisewa hinuwa'abiyedi tu omi keke kwamayoku wadahawatadi au wahawahegedi. <sup>21</sup> Iya tova gaveledi higa yadi udo hidavenikohiyena be Iya agaikuya hidahagaviladi, tu hidibutoyoga. <sup>22</sup> Keke nuwanuwadi yadi dewa udo'udona hinahegeni fa'ina, aulolo ana iviya ganahegedi ada badi buye hi'udo'udo-ma vita keke kabi'ona ganaveledi. E, ka'i badi'e adi tufo keke yadi dewa udo'udona hinavenikohiyeni digo, adamoya aulolo tagiya lakahina ganaveledi. <sup>23</sup> Badi yadi vehawala nuwadi givaina amanadi vaita natudiyao amine, ada kadu badi'iyao ganaluve'alikadi. Ada au tovetumagana adi yo'o melala tulina tulina agaidiya hinahalamanena Iya kaliva ase'asedi kadu nuwadi ga'ita'itafolena, ada omi sa'eyana sa'eyana yami dewa amine ganalaufata.

<sup>24-25</sup> Tu omi velugamiyao Daiyataila againe wamimiyami-ma kadu agaimiya

ganagahe, higa omi mena vehawala koyona wadibutoyogena ada keke nuwanuwa i'ikauna hivewagana Setani yana nuwahnage ma againe wadasikulu. Yaku gahe hidede amine. Keke vehimeya vitana kadu ganavelemi. Au mena yami dewa hagihagina ahe galukahihiyena-ma wanakidonena wananunauwena tu yaku yewa'ela ana tova.

<sup>26-28</sup> Hai kaliva Iya fa'ikuya yana atuvefa'ila againe ginafaiwala-mo'a be yaku nuwanuwa amine ginahuluhuluva alika ana maka, medema abavehimeya ganavelena be tomiyababi adi yo'o tulina tulina ginavehimeyedi. Boi Kamaku abavehimeya giveleku amine, meda badi Iya fa'ikuya hi'atuvefa'ila-ma ganaveledi. Yadi wafuluma kainumula yo'o tulina tulina hina'itave'avididi be fuluma avaeka giluyavalina amine nibaidiyao fifiwaladiyao hinaluyawelidi. Kadu badi to'atuvefa'ila malatutulova ganaveledi.

<sup>29</sup> Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Au hidedemi bonaku.”

### 3

*Keliso yana venuwa'ata Sadisi tovetumagana  
adi yo'o agaidiya.*

<sup>1</sup> Kadu'e Keliso gigaheku gigayo, “Fefe una'etoladina be Sadisi againe ginana, higa bana Yaubada yana tovenuwa'ata tovetumagana adi

yo'o gi'ita'itave'avidima yana leta. Hidedemi yaku nuwanuwa una'etoladina miSadisi unagahedi unagayo,

Iya Yaubada Alu'aluwana ana ita vaita alu'aluwa seveni amine kadu ibadibadi seveni agaikuya hidadauda-ma bonaku hidedemi. Yami dewa gahalamanena. Omi valeyami ma vaita yami vetumagana toyogina amine kaliva matadiya, atu wona velemona omi to'alika yami vetumagana kabisona ginahavaina. <sup>2</sup> Wamidi! Mene yami vetumagana kabisona ginayawowola-ma wanakivetoyogina. Wa'ita, Iya gahalamanena yami dewa aimo keke haghagi-mo'ena yaku Yaubada matane. <sup>3</sup> Aimo keke velemona wadanuwanuwa-haghagi fa'ina, gavaimi yaku kaliva givehawalemi be wanogalina, medemi wananuwa-nunauyena. Au vehawala wavenogale be wanuwavilami. Atu ka'i keke wanamidi, au tokai'afu amine gana'elakau be matahiwadi againe ganaveyaulowogimi.

<sup>4</sup> Atu Sadisi againe tufoimi ami kaleko keke wadakivebwaneneni, higa yami dewa yegayegana. Medema fa'ina kaleko kwayakwayana againe wanavaigau-yo Iya buye kananunudadana, fa'ina au amifata. <sup>5</sup> Hai kaliva Iya fa'ikuya yana atuvefa'ila againe gifaiwala-mo'a, medema badi'iyao amine kaleko kwayakwayane ginavaigau. Kadu bana ana egana yaku buki againe keke-mo'a ganayawelini. Buki-nadi againe badi wayawai-vagahidi ma adi egana gidadauda. E, keke ganayawelini, au Kamaku matane kadu

badi yana tovenuwa'ata matadiya bana fa'ine ganagahe ganagayo, Bana hidevama yaku kaliva.

<sup>6</sup> Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Bonaku au hidedemi.”

*Keliso yana venuwa'ata Filadelifiya tovetumagana*

*adi yo'o agaidiya.*

<sup>7</sup> Kadu'e Keliso gigaheku gigayo, “Fefe una'etoladina be Filadelifiya againe ginana, higa bana Yaubada yana tovenuwa'ata tovetumagana adi yo'o gi'ita'itave'avidima yana leta. Hidedemi yaku nuwanuwa una'etoladina miFiladelifiya unagahedi unagayo,

Iya kaliva mahamahaliku kadu velemodi ma bonaku hidedemi. Tuwai-mo'ena tokaiwabu Devida Yelusalema ana tovehimeya, ada kihi bana againe kaliva yadi luku fa'ina. Meda Iya Yelusalema ivaguna ana tovehimeya ada kihi we'a agaikuya. Ka'i mena yaku abaga ana wanafali ganayauna, au keke tamo hakwadi anafaiweya ginafalini. Kadu ka'i ganafalina, keke tamo hakwadi ginayauni.

<sup>8</sup> Yami dewa gahalamanena. Yami faiwala kabi'ona nonogana bonaku wa'abina kadu keke wadavekekeyeku. Au wanafali omi matamiya gayauna tu keke tamo hakwadi anafaiweya ginafalini.

<sup>9</sup> Kadu ganagahe. MiYuda tufoidi yami melaleya higahe vaita

badi Yaubada yana yo'ogaga tu hifwaya. Manuwa-abavehawala ana egana sinagogi againe hitafatafalolo nonogana badi Setani yana manuwa kalivai-dina. Yaku vehimeya againe badi kalivai-dina agaimiya hina'ela hina'ibo'ula-mo'a, ada hinahalamanena Iya Tauku agaimiya ganuwanuwa. <sup>10</sup> Boi gavehimeyemi higa vaita yami wa'asevatu Iya fa'ikuya wada'atuvefa'ila. Mena bonaku wa'abina fa'ina, aimo vita lakahi-mo'ena fafali tulina tulina agaidiya ginalakayemu be tomiyababi moya'aidi ginagalualuvadi ana toveya, Iya omi ganalugolegolemi.

<sup>11</sup> Wa'ita, Iya ganamadu'ela. Yami faiwala kabi'ona nonogana yami vetumagana wanakidonena be higa keke tamo hakwadi ami laufata haghagina ginalemami. <sup>12</sup> Hai kaliva Iya fa'ikuya yana atuvefa'ila againe ginafaiwala-mo'a, ganavehimeya be bana yaku Yaubada yana manuwa ginave'ogolena. Keke-mo'a ginahobu, Yaubada matane ginamiyamiya-vagata. Bana againe egana tohiye gana'etoladidi, eganai-dina yaku Yaubada ana egana, yaku Yaubada yana melala ana egana higa Yelusalema ivaguna aimo yaku Yaubada againe walobameya ginahobu'ela-ma melalai-nadi, kadu aku egana ivaguna.

<sup>13</sup> Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Au hidedemi bonaku.”



*Keliso yana venuwa'ata Leyodisiya tovetumagana*

*adi yo'o agaidiya.*

<sup>14</sup> Kadu'e Keliso gigaheku gigayo, “Fefe una'etoladina be Leyodisiya againe ginana, higa bana Yaubada yana tovenuwa'ata tovetumagana adi yo'o gi'ita'itave'avidi-ma yana leta. Hidedemi yaku nuwanuwa una'etoladina miLeyodisiya unagahedi unagayo,

Iya aku egana To'asevatu, Iya Yaubada ana tohawavemogatala dibudibumuhigiku yaku gahe velema'ena, Yaubada yana aibubuna Iya agaikuya give'inuba-ma kalivai-kuna bonaku hidede amine. <sup>15</sup> Yami dewa gahalamanena. Keke wadakiloweku tu kadu wakiloweku. Iya nuwanuwaku wana'idibumuhigeku. Ka'i keke wana'idibumuhigeku au wanakiloweku. <sup>16</sup> Keke wadakiloweku tu kadu wakiloweku fa'ina, omi vaita gufaleda wayawayana kaliva hikilowena amanadi. Omi keke bwai ginaginana amine kadu keke gufa tutumina amine. Omi vaita wayawayamiyao fa'ina gana'alahiwegemi. <sup>17</sup> Omi wagahe wagayo, Ide wakalivadeyao. Lokoloko moya'aina kanuhagana, gaitoma moya'aina adafaiweya. Hidedemi wagahe tu keke wadahamaneni omi koyokoyo'avamiyao yami miya koyona, Yaubada yana lokoloko ana yaudi wafaniyena, omi vaita tovematakoyo kadu tovekonekone amine. <sup>18</sup> Au gagahevagadonemi be lokolokofou gola-mo'enaga amine Iya agaikuya wanakimonena be amifaiweya wanakaiwabu. Mena gola ma babiya

hiyalana digo wayogona buye hivetagovina be gi'ulafuwana againe gola-mo'ena avaekeya gida tu momolu hihegena. Kadu kaleko yegayegana agaikuya wanakimonena be yami vekonekone wanakevani-yo yami wowomumu ginahavaina. Kadu vematakoyo ana mulamula agaikuya wanakimonena be matamiya wanaseni-yo nuwanuwa velemo'ena amifaiweya wana'itahalamanena.

<sup>19</sup> Gaveyao agaidiya ganuwanuwa, medema gadakeyedi kadu gakivenuwaviladi. Omi agaimiya ganuwanuwa fa'ina, wana-madunuwavilami ada wana'i'idibumuhiga.

<sup>20</sup> Iya we'a lilimiya gamidimidi. Kaliva tobohiyana yana eda'awaneya gilautoli higa vaita gidaluku amine, meda Iya nuwami ana eda'awaneya galulautoli higa nuwamiya gadaluku. Gava kaliva agoku ginogalina be gihawahegeku, medema againe ganaluku be bana ganavetobohiyanena kadu Iya ginavetobohiyaneku. <sup>21</sup> Boi yaku atuvefa'ila againe gafaiwala-mo'a be Kamaku yana didiga'u'u againe buye avetogama. Meda anafaiweya hai kaliva Iya fa'ikuya yana atuvefa'ila againe ginafaiwala-mo'a, medema ganahawahegena be yaku didiga'u'u againe buye anavetogama.

<sup>22</sup> Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Au hidedemi bonaku.”

## 4

*Tomiyalobama moya'aidi Yaubada yana didiga'u'u againe*

*hihawadavadavana.*

<sup>1</sup> Tu Keliso yana venuwa'ata tovetumagana adi yo'o seveni agaidiya gilukahihi gihavaina, kadu ga'eno'ita. Gamiyami tu auhe'ama wanafali yauyaugina lobameya ga'itana. Bana agonainadi vaita hiulega amine boi gamidinogalina ma gigahe-havagileku gigayo, “Ulaka'ela we'ai, be aimo kabisona gavadi gavadi makewa'e hinalakayemu-ma ganavehawale.” <sup>2</sup> Gigahe-yo auhe'ama Yaubada Alu'aluwana giluvaiyeku ada mene lobameya didiga'u'u matakuya gidadauda ada Kaliva Sa'eyana didiga'u'uuya givetogana. <sup>3</sup> Ada Bana didiga'u'uuya givetogana ma ana ita'ita mahamahali-mo'ena vaita kabala yabeyabelidi luhei yamuyamumu-'owogina kadu ve'akinamanamalina amine. Kabalai-dina adi egana diyasifa kadu kaneliyani. Kadu mena didiga'u'uuya bowa gidonena ana ita vaita kabala matamatagina ana egana emelodi amine. <sup>4</sup> Mena didiga'u'u kikaiwabuna hinafane gidadauda ada didiga'u'u kadu tuweniti-fowa himidifina, tu didiga'u'u-dina agaidiya tomiyalobama adi tonagona tuweniti-fowa hivetogadi. Kaleko kwayakwayana againe hivaigau ada u'udiya badau kikaiwabuna gola againe hibubuna-ma gidadauda. <sup>5</sup> Ada mena Yaubada yana didiga'u'u

kikaiwabuna againe tova moya'aina nama gisisinamana, vaita gaveyao agodi amine butuna lakahina gilaulauga, atala gihegehegena. Kadu didiga'u'u wamagigine daki seveni hi'ala'alata, higa Yaubada Alu'aluwana ana ita alu'aluwa seveni. <sup>6</sup> Kadu didiga'u'u gava wamagigine tamo gavadi ga'itana ana ita ma vaita lehaga atumanamanahina amine, e kabala vaita kelasi amine ve'akinamanamalina.

Tu hinafane-mo'ane gaitoma wayawaidi fifiwaladiyao adivefowa Yaubada yana didiga'u'u himidififina, ada matadi wowodi matatabuna gilagana wamagigidiya kadu wakwaudiya. <sup>7</sup> Ada badi gaitoma wayawaidi fifiwaladiyao adivefowa sa'eyana ma ana ita vaita kevakeva manimaninina ana egana laiyoni amine, kadu sa'eyana ana ita vaita bulumakau hala amine, kadu sa'eyana magigina ana ita vaita kaliva amine, kadu sa'eyana ana ita vaita manubutu giyaveyavega-ma amine. <sup>8</sup> Ada badi gaitoma wayawaidi fifiwaladiyao sa'eyana sa'eyana wa'ofadi sikisi ada wowodi matatabuna agaidiya tabone kadu dibune matadi gilagana. Tova moya'aina hikwelidavadava uyadayada be bogi hinunauwena tu keke ma'i hida'ilova higayo, Mahamahalina, mahamahalina Yaubada Kaiwabu Tofaiwala-mo'a Bana'e au mahamahalina. Tova moya'aina gimiyamiya-vagata, tuwaina gimiyami adamoya gimimiyami aimo ginamiyami keke ana abalauyabu. Au hidedemi yadi kwelidavadava.

9-10 Badi wayawaidiyao adivefowa Bana'e didiga'u'uya givetogana be gimiyamiya-vagata ma yadi kwelidavadava againe hiha-hawavekaiwabuna kadu hive'amohimohinena kadu hivesivesiuleyena ana toveya, au badi tomialobama adi tonagona tuweniti-fowa Bana didiga'u'u againe givetogana-ma againe hi'ibo'ula-mo'a, ada hidedemi Bana gimiyamiya-vagata-ma hihawadavadavana. Adi badau kikaiwabuna Bana agene hihegena higayo,  
 11 O'eni yama Kaiwabu kadu yama Yaubada. Gilubodama be anahawavekaiwabuye, kadu O anave'amohimohine be a egana fifiwala-mo'ena anakilakahina. E, yama hawadavadava O giluboda. Fa'ina gaitoma moya'aidi O ububudi, ya nuwanuwa againe hilakayemu be adamoya himimiyami. Au hidedemi yadi kwelidavadava.

## 5

*Yesu Yaubada yana Sifi kabi'ona buki uwa'uwana*

*gisiyagilina.*

<sup>1</sup> Gamiyami tu Bana'e didiga'u'uya givetogana-ma buki uwa'uwana nimana i'atagine ga'itana. Buki-nadi againe etoladi wafafalina gidadauda, ana itava bulava seveni vaita autafa amine.  
<sup>2</sup> Ada lobama ana tovenuwa'ata fifiwalana ga'itana, bana gikova'awafatafata gigayo,

“Hakwa'adi yana wa'abavehimeya gimimiyami-yo anafaiweya bulava ginagolohini-yo buki ginasiyagilini?”<sup>3</sup> Tu keke tamo hakwadi lobameya o babiya o to'alika yadi abageya gidamiyami-yo anafaiweya buki gidasiyagilini-yo hinagene gida'ita.<sup>4</sup> Ada keke tamo hakwadi yana wa'abavehimeya hidanuhagani-yo anafaiweya buki gidasiyagilini be hinagene gida'ita amanadi fa'ina, iya gatagitagi lakahina.<sup>5</sup> Gatagitagi tu tomiyalobama adi tonagona adi yo'o kalivana sa'eyana Yesu fa'ine gigaheku gigayo, “Keke unatagitagiya. U'ita, bana tokaiwabu Devida bwanenena kikaiwabuna Yuda yana yo'o kalivana gifaiwalahegahega-mo'a. Bana'e kaliva fifiwala-mo'ena ana egana Yuda yana yo'o ana Laiyoni. Bana gifaiwalahegahega-mo'a fa'ina anafaiweya bulava seveni ginagolohidi be buki ginasiyagilina.”

<sup>6</sup> Gigahe-yo Sifi kabi'ona ga'itana, didiga'u'u hinafane-mo'ane gimidi ada badi wayawaidi fifiwaladiyao adivefowa kadu tomiyalobama adi tonagona tuweniti-fowa himidififina. Bana Sifi kabi'ona ana ita waki'onina vaita gida'alika be gidamididi-havagi, ada ana siko seveni kadu matana seveni, medema Yaubada Alu'aluwana ana ita vaita alu'aluwa seveni amine, badi Yaubada fafali tulina tulina babiya gi'iveninisedi amanadi.<sup>7</sup> Bana gina buki Yaubada i'atagine gidadauda-ma givaina.<sup>8</sup> Givaini-yo badi wayawaidi fifiwaladiyao adivefowa kadu tomiyalobama adi tonagona tuweniti-fowa Sifi kabi'ona againe hi'ibo'ula-mo'a. Badi sa'eyana sa'eyana agaidiya kweli ana aba'iveyamumu

vaita kita haghagina amine hidadauda, kadu nau'a gola againe hibubuna-ma hi'abina. Vanedimodimo ana egana inisenisi nau'a gola himaga, inisenisi ana nuwanuwa ma Yaubada yana yo'ogaga yadi ve'o'ola Yaubada againe. <sup>9</sup> Ada kweli ivaguna Yesu againe hikwelikweliyena higayo,

Ya wa'abavehimeya fa'ina giluboda buki unavaina be ana bulava unagolohina. O giluboda fa'ina hiluve'alika ada O dayaginiya kaliva moya'aidi ututuehobudi be Yaubada yana giba fa'ina.

Badi kalivai-dina yo'o tulina tulina meyadi tulina tulina kadu adi loi tulina tulina ada fafali tulina tulina agaidiya hive'inuba.

<sup>10</sup> Ahe ukilakahidi be ya abavehimeya againe badi O buye wavehivehimeya, kadu yada Yaubada ana hawadavadava ana tofaisewa usedi, ada babi matatabuna hinavehivehimeyena. Au hidede amine badi wayawaidi adivefowa kadu tonagona tuweniti-fowa yadi kwelidavadava.

*Tomiyalobama kadu gaitoma moya'aidi i'ibunidi yadi kwelidavadava.*

<sup>11</sup> Kadu'e ga'ita-havagi be lobama ana tovenuwa'ata keke sa'eyadi agodi ganogalina, adi kilagalaga tausani tausani a gavaiyehi. Badi tovenuwa'ata Yaubada yana didiga'u'u kadu badi wayawaidi fifiwaladiyao adivefowa kadu

tomiyalobama adi tonagona tuweniti-fowa himidifidi. <sup>12</sup> Agodi lakahina hikwelikweli higayo,

Yaubada yana Sifi kabi'ona hiluve'alikana.  
Gilubodana be Bana ide ginavehivehimeyeda,  
Yana lokolokofou yana nuwahuya  
yana faiwala fa'ina kanakilakahina.

Gilubodada be Bana kanave'amohimohinena  
be kanakivekaiwabuyena be kanadavadavana.

E, yada hawadavadava Bana gilubodana.

Au hidedemi tovenuwa'ata yadi kwelidavadava.

<sup>13</sup> Kadu'e gaitoma moya'aidi i'ibubunidi lobameya babiya to'alika yadi abageya lehageya, e fafali moya'aina agaidiya himimiyami-ma yadi kweli ganogalina. Higayo,

Bana'e didiga'u'uya givetogana kadu Sifi kabi'ona adi egana kanakilakahina kadu kanave'amohimohinedi.

Yadi kikaiwabu kadu yadi faiwala kanakivetubugina tova inaga inaga keke ana abalauyabu.

<sup>14</sup> Au hidede amine moya'aidi yadi kwelidavadava tu badi wayawaidi fifiwaladiyao adivefowa higahe higayo, "Ehe hidedemi," kadu badi tomiyalobama adi tonagona hi'ibo'ula-mo'a be Kaiwabu luhei hihawadavadadi.

## 6

*Buki ana bulava vaita autafa amine ma ana aigolota.*

<sup>1</sup> Tu iya aimo galulauboda tu Bana Yaubada yana Sifi kabi'ona buki ana bulava vaita



autafa amine bulava tomo'ainagona gigolohina. Gigolohini-yo gaitoma wayawaidi fifiwaladiyao adivefowa ana kaliva sa'eyana agona lakahina vaita atala gidahegeni amine ma gigahe gigayo, “U'ela.” <sup>2</sup> Ga'ita tu auhe'ama hosi kwayakwayana mene matakuya gimidi. Hosi kwaune kaliva sa'eyana gihiyoto yana sufi gi'abina ada badau kikaiwabuna u'une hihifona. Au bana gitauya higa gidalugaviya be gidafaiwalahega-mo'a.

<sup>3</sup> Bana gina tu Sifi kabi'ona buki ana bulava anavelu gigolohini-yo gaitoma wayawaidi fifiwaladiyao anavelu agona ganogalina gigahe gigayo, “U'ela.” <sup>4</sup> Au hosi velugana gilakayemu ana ita yabeyabeli-mo'ena. Bana kaliva kwaune gihiyoto ana vehimeya ma kukuya babi againe ginavaihegeni-yo kaliva buye hinave'amunumunuga. Ada fetu lakahina hivelena.

<sup>5</sup> Yana fetu hivelena gihavaina, Sifi kabi'ona buki ana bulava anaveto gigolohini-yo gaitoma wayawaidi fifiwaladiyao anaveto agona ganogalina gigahe gigayo, “U'ela.” Ga'ita tu auhe'ama hosi kukwauhi-mo'ena, mene matakuya gimidi. Bana kaliva hosi kwaune gihiyoto-ma lokoloko ana abasivekuke gi'abina.

<sup>6</sup> Au ago'ago ganogalina vaita tamo hakwadi gaitoma wayawaidi fifiwaladiyao adivefowa agaidiya gidakova gidagayo, “Kaliva moya'aidi hinaffaisewa be fatadi aiyeta sa'eyana analaga hinavaina tu mani-nadi againe a'a kabi'onaga vaita kuvi sa'eyana o ka'i tafiyoko tohiye adifaiweya hinakimonena. Atu ai hagihagidi keke unakivekoyodi be higa bunama kadu oine

aimo ginadauda.”

<sup>7</sup> Gilukahihi gihavaina Sifi kabi'ona buki ana bulava anavefowa gigolohini-yo gaitoma wayawaidi fifiwaladiyao anavefowa agona ganogalina gigahe gigayo, “U'ela.” <sup>8</sup> Ga'ita tu auhe'ama hosi ana ita vaita gidahaniwedalini-ma amine mene matakuya gimidi. Bana kaliva hosi kwaune gihiyoto-ma ana egana Alika ada bana wakwaune hosi velugana gimuliyena ana kaliva ana egana To'alika yadi Abaga. Badi adi'iseluga yadi wa'abavehimeya, adi vehimeya hidede amine. Tomiyababi tufoidi moya'aidi hinaluve'alikadi. Tufoidi ma buye hinave'amunumunuga be hina'alika, tufoidi lokeya hina'alika, tufoidi auloloya hina'alika, tufoidi kevakeva manimaninidiyao hinayovadi be hina'alika. Tomiyababi hina'alika-ma adi kilagalaga hidede amine. Ka'i kanadakadi bo'u fowa againe digo, bo'u sa'eyana kalivai-dina hina'alika.

*Tovetumagana kaliva hiluve'alikadi-ma yadi koya.*

<sup>9</sup> Tu Sifi kabi'ona buki ana bulava anavefaifi gigolohina againe, Yaubada yana atudidiga inubane kaliva aluwadi ga'itadi, badi kalivai-dina Yaubada bonana againe hiluve'avina kadu Yesu fa'ine hi'awatalatalaina fa'ina kaliva koyodiyao hiluve'alikadi amanadi. <sup>10</sup> Badi kaliva aluwadi moya'aidi hikova'awafatafata higayo, “Yama Kaiwabu Fifiwala-mo'e, O mahamahali, ya nuwanuwa matatabuna velemono'ena. Gava tova badi tomiyababi hiluve'alikama amanadi

unavedewayaugidi-yo agaidiya dayagima unafatani?”<sup>11</sup> Hidedemi higahe tu vaigau kwayakwayana badi sa'eyana sa'eyana giveledi ada gigahedi gigayo, “Tova kabisona yami wa'atuvefa'ila kadu wanaboda. Nagona tobohiyamiyao higa yaku tofaisewa anafaiweya omi'iyao hinaluve'alikadi hinanunauwena tu moya'aimi ami kilagalaga Iya gavehimeyena amine hinaluyabuna, au adi laufata hinavaina.” Hidedemi gigahedi.

*Yaubada yana ila'a lakahina.*

<sup>12</sup> Tu aimo galulauboda tu Sifi kabi'ona buki ana bulava anavesikisi gigolohina. Auhe'ama babi gili'uli'u lakahina, kadu kauwana gikwauhina vaita avaeka wauyona amine, ada vaikohi givivilina-ma giyabelina vaita dayaga amine. <sup>13</sup> Kadu ibadibadi babiya hibe'u vaita bolimana-kouko gidamadu be nila bouna gidatafimwanumwanuni amine. <sup>14</sup> Kadu lobama giyawowola vaita ivi hi'uwana be hisenauwena amine. Kadu oya be himula matatabudi hili'uli'u be hitogadamamana.

<sup>15</sup> Mena gaitomai-dina hilakayemu againe, babi ana tokikaiwabu, badi tovehimeya, badi tolugaviya adi togiyomatana kikaiwabudiyao, badi wakalivadiyao kadu fifiwaladiyao kadu mali kaliva moya'aidi agetoga adi kauve'a buye'i hi'ota be oyeya vatulumeya gouya hiveu. <sup>16</sup> Oya kadu kuga lakahidi agaidiya hikovakova higayo, “Agaimeya wanabe'u be Bana didiga'u'uya givetogana-ma magigina againe

wanasevauyema kadu Sifi kabi'ona yana ila'a againe wanasevauyema. <sup>17</sup> Au yadi ila'a ana tova lakahina ahe gilakayemu be ama laufata anavaina. Gavaimi be Badi adi'iselu yadi ila'a kada'atuvefa'ileni?"

## 7

### *Yaubada yana tofaisewa gisetagodi.*

<sup>1</sup> Yaubada yana ila'a yana lakayemu ga'itana tu kadu ga'eno'ita. Lobama ana tovenuwa'ata fowa babi matatabuna himidififina-ma ga'itadi, ada bolimana matatabuna hihawatadi, yavalata bolimana newalidebola newali'oya be higa keke avaleya o lehageya ginamadu kadu keke tamo ai lukumina ginalewalewa. <sup>2</sup> Tovenuwa'ata fowa ga'itadi tu kadu tovenuwa'ata velugana kauwana abalakavine gilaka-ma ga'itana, Yaubada yana abasetagona gi'abina. Badi tovenuwa'ata fowa agaidiya gikova'awafatafata, badi Yaubada gi-hawahegedi be avala lehaga kadu ai bolimana yadi madu againe hinakivekoyodi-ma kalivaidina. <sup>3</sup> Gikovadi gigayo, "Keke avala o lehaga o ai wanamadukivekoyodi tu nagona yada Yaubada yana iya'iyaya againe yana tofaisewa deba'aidiya ana'atuvefotana higa anasetagodi." <sup>4</sup> Gisetagodi-yo adi kilagalaga ganogalina higa miIsileli adi yo'o sa'eyana sa'eyana agaidiya kaliva gisetagodi-ma adi ve'atutamo'aina 144,000 (hanaledi foti fowa tausani).

<sup>5-8</sup> Yuda ana yo'o agaidiya 12,000 gisetagodi. Lubeni ana yo'o agaidiya 12,000 gisetagodi.

Gada ana yo'o agaidiya 12,000 gisetagodi.  
 Asa ana yo'o agaidiya 12,000 gisetagodi.  
 Nafitalai ana yo'o agaidiya 12,000 gisetagodi.  
 Manasa ana yo'o agaidiya 12,000 gisetagodi.  
 Simiyoni ana yo'o agaidiya 12,000 gisetagodi.  
 Livai ana yo'o agaidiya 12,000 gisetagodi.  
 Isaka ana yo'o agaidiya 12,000 gisetagodi.  
 Sebuloni ana yo'o agaidiya 12,000 gisetagodi.  
 Yosefa ana yo'o agaidiya 12,000 gisetagodi.  
 Beniyamina ana yo'o agaidiya 12,000 gisetagodi.  
 Mena yo'o kalivai-dina 144,000 Yaubada yana  
 iya'iyaya againe gisetagodi.

*Yo'oyo'o lakahi-mo'edi Yaubada hihawadava-  
 davana.*

<sup>9</sup> Tu muliya kadu ga'eno'ita ada auhe'ama  
 yo'oyo'o lakahi-mo'edi matakuya himidi, adi kila-  
 galaga ma keke tamo hakwadi anafata. Badi fafali  
 tulina tulina kadu yo'o tulina tulina hive'inuba, e  
 adi loi tulina tulina meyadi tulina tulina. Yaubada  
 yana didiga'u'u wamagigine kadu Sifi kabi'ona  
 buye matadiya himidimidi. Kaleko kwayak-  
 wayana againe hivaigau ada bodaboda didina  
 hi'abi'abina. <sup>10</sup> Ada hikova'awafatafata higayo,  
 Yada Yaubada didiga'u'uya givetogana-ma  
 kadu yana Sifi kabi'ona agaidiya  
 ada kibababala give'inuba.

<sup>11-12</sup> Lobama ana tovenuwa'ata matatabudi  
 Yaubada yana didiga'u'u kadu tomiyalobama adi  
 tonagona kadu gaitoma wayawaidi fifiwaladiyao  
 adivefowa himidififidi. Didiga'u'u wamagigine

hi'ibo'ula-mo'a be Yaubada hihawadavadavana  
higayo,

Yada nuwanuwa hidede amine.

Yada Yaubada kanadavadavana,

kanakivekaiwabuyena kanavesiuleyena,

yana nuwahuya, yana abavehimeya

yana faiwala fa'ina kanakilakahina.

E, Bana'e kanave'amohimohinena

tova inaga inaga keke ana abalauyabu.

Ehe hidedemi.

Au hidedemi yo'oyo'o matatabu-mo'edi yadi  
kwelidavadava.

<sup>13</sup> Tu tomiyalobama adi tonagona sa'eyana  
gitoliyeku gigayo, “Badi kaleko kwayakwayane  
hivaigau-ma badi gaveyao, hami eda hi'ela'ela?”

<sup>14</sup> Iya gabonalaufata gagayo, “Kauveya, o uhala-  
manena.”

Ada bana gigayo, “Badi ve'umagigi lakahi-  
mo'ena hinagene hiyemuyemu. Nuwahinagedi  
ana vaigau Sifi kabi'ona dayagine hikolana be  
gikwaya-mo'ena.

<sup>15</sup> Au hidedemi hiyegayega fa'ina,

Yaubada yana didiga'u'u wamagigine  
himimiyami

ada uyadayada be bogi Yaubada yana manuwa  
wese lobameya Bana matane hififaisewa.

Ada Bana didiga'u'uya givetogana-ma  
yana lifi lakahina againe give'aiwa'udi.

<sup>16</sup> Keke-mo'a mafu ginalau-havagiledi,  
keke-mo'a agodi ginataina-havagi.

Kauwana lakahina keke ginakabudi,

keke kalalava ginakalalavidi.

<sup>17</sup> E, keke tamo vita hinanuhagani fa'ina

Sifi kabi'ona Yaubada yana didiga'u'u hinafane-  
mo'ane  
gimimiyami-ma badi yana sifi adi To'itave'avina.  
Gufa miyamiya-vagahina ana guya againe gi-  
naveyudi.

Ada Yaubada matailudi sa'eyana sa'eyana  
ginaluhegehegena.”

Au hidedemi tomialobama adi tonagona  
sa'eyana givenuwa'ataku.

## 8

*Buki ana bulava vaita autafa amine anaveseveni gigolohina.*

<sup>1</sup> Tu Sifi kabi'ona buki ana bulava anaveseveni gigolohina againe, moya'aidi hi'ilova bai hafuna amine amumu gikuluna lobameya. <sup>2</sup> Ada lobama ana tovenuwa'ata seveni tova moya'aina Yaubada matane himidimidi-ma ga'itadi, ada badi agaidiya hiulega seveni gifolakedi.

<sup>3-4</sup> Kadu tovenuwa'ata velugana giyemu inisenisi ana aba'akabu liline gimidi. Bana inisenisi ana nau'a gola gi'abina. Yaubada vanedimodimo ana egana inisenisi lakahina givelena be higa aba'akabu gola didiga'u'u wamagigine gidadauda-ma againe ginakabuna. Ada vanedimodimo gikabuna-ma Yaubada yana kaliva mahamahalidiyao moya'aidi yadi ve'o'ola buye give'atutamo'aina, ada siyona wamagana yamumuna ve'o'olai-dina buye tovenuwa'ata nimane be gilakalaka Yaubada matane. <sup>5</sup> Au bana tovenuwa'atai-nadi gina ai'ala'alata

**7:17:** Ha 5:9 Ha 7:9 Md 24:21, 1Yo 1:7 Ais 49:10  
Sam 23:2, Ais 25:8

**7:17:** Ha 21:4,

atudidiga againe givaina digo inisenisi ana nau'a givemagana au babiya gihegehobuyena. Auhe'ama atala gihegehegena, butuna gilaulauga, nama gisisinamana kadu babi gili'uli'udona.

*Tovenuwa'ata seveni hivebutu yadi hiulega hiyuvena.*

<sup>6</sup> Tu bana tovenuwa'ata ai'ala'alata babiya gihegehobuyena gihavaina, badi tovenuwa'ata seveni hikidewadewa be higa yadi hiulega seveni hinayuvedi. <sup>7</sup> Bana tovenuwa'ata nagona yana hiulega giyuvena, au wehi kugakugana aisi amine kadu ai'ala'alata dayaga buye give'atutamo'ainama babiya gi'alilihiwana. Babi ana tufo tohiye ma ana tufo luhei auwe yamumuna tu ana tufo sa'eyana ma gi'ala-'owona, meda ai kadu isisi'u ana tufo sa'eyana gi'ala-'owona.

<sup>8-9</sup> Tu bana tovenuwa'ata anavelu yana hiulega giyuvena, au gaitoma vaita oya lakahi-mo'ena gi'ala'alata-ma lehageya givelusefuyena. Lehaga ana tufo tohiye ma ana tufo luhei auwe yamumuna tu ana tufo sa'eyana ma givedayaga, meda lehaga ana igana ana tufo sa'eyana hi'alika kadu waka ana tufo sa'eyana hikamomola.

<sup>10-11</sup> Tu bana tovenuwa'ata anaveto yana hiulega giyuvena, au badibadi lakahina vaita daki giyabeyabela-ma amine lobameya gi'akakilina be gufa lakahidi kadu guya agaidiya gihobu. Gufa guya ana tufo tohiye ada ana tufo luhei au yamumuna tu ana tufo sa'eyana ma givegolagola ada kaliva tufoidi moya'aidi gufai-nadi hiyunama hi'alika. Mena badibadi ana egana Golagola.



<sup>12</sup> Tu bana tovenuwa'ata anavefowa yana hiulega giyuvena, au kauwana vaikohi ibadibadi hi'uyuyu. Kauwana ana tufo tohiye ma ana tufo luhei auwe yamumuna tu ana tufo sa'eyana ma gi'uyuyu. Meda anafaiweya vaikohi kadu ibadibadi adi tufo sa'eyana hi'uyuyu. Uyadayada ana tufo sa'eyana keke tamo mahalina kadu bogi ana tufo sa'eyana keke tamo mahalina.

<sup>13</sup> Iya galulauboda tu manubutu sa'eyana lobama hinafane giyaveyavega-ma agona ganogalina, gikova'awafatafata gigayo, “Hoiyoi! Hoiyoi! Omi tomiyababi hoiyoi! Badi lobama ana tovenuwa'ata tohiye aimo himimiyami-ma sa'eyana sa'eyana yadi hiulega hinayuvana againe, vita koyo-mo'ena tulina tulina agaimiya ginalakayemu.” Au hidedemi manubutu gigahe.

## 9

### *Hiulega anavefaifi ana aiyuve fa'ina.*

<sup>1</sup> Tu bana lobama ana tovenuwa'ata anavefaifi yana hiulega giyuvena, au kaliva sa'eyana ana ita vaita badibadi sa'eyana lobameya gi'akakilina-ma babiya gihobu'ela. Bana balauma yadi abaga ana kihi givaina, abagai-nadi ana egana Kahu Tunugi-vadavada'aina. <sup>2</sup> Kahu giyauna againe, siyo lakahina gilaka vaita ubula lakahi-mo'ena siyona amine. Siyo Kahuya gilaka-ma againe kauwana kadu lobama gi'uyuyubodena. <sup>3</sup> Ada siyo-nadi hinagene koloma lakahidiyao babiya hihobu, ada faiwala tulina hivaina be yadi aiyovaga

vaita atagikwamana amine. <sup>4</sup> Yaubada yana vehimeya againe adi hawata hivaina higa isisi'u ai a'a gikabukabu-ma keke hinakivekoyoni, tu adi vehimeya ma badi kaliva Yaubada yana iya'iyaya deba'aidiya keke gidadauda-ma hinakivekoyodi. <sup>5</sup> Keke gidahawahegedi be hinaluve'alikadi, au vaikohi faifi agaidiya yadi aiyovaga againe aulolo lakahina hinaveledi. Ada aulolo lakahi-mo'ena againe hivedivediwe vaita atagikwamana kaliva giyovana be givedivediwe amine. <sup>6</sup> Medema vaikohi faifi agaidiya alika hinalelena tu hinalewayoga keke adifata. Hinagahe hinagayo, “Hoi! Hima kavedivediwe kada'alika.” Hidedemi hinagahegahe tu Yaubada keke alikeya ginahawahegedi.

<sup>7</sup> Tu mena kolomai-dina adi ita ma vaita hosi gaviya fa'ina hivevigauna-ma amine. Badau kikaiwabuna gola u'udiya hisedi ada magigidi ana ita vaita kaliva magigidi ana ita amine. <sup>8</sup> U'udi vaita vevine u'udi tunugina amine, nigodi sinasinahina vaita laiyni manimaninina nigona amine. <sup>9</sup> Manawadi ana vaigau vaita abaseboda kainumula amine, ofadi butuna vaita ubula lakahina giluluvetaveta'ala-ma amine. <sup>10</sup> Giudi ana wagiyo vaita atagikwamana amine, ada mena giudi againe kaliva hina'i'iyovaga be aulolo lakahina againe hinavedivediwe vaikohi faifi agaidiya. <sup>11</sup> Kadu bana Kahu Tunugi-vadavada'aina ana tokaiwabu meda badi kolomai-dina adi tokaiwabu. Bana ana egana bona Hibeliu againe ma Abadoni tu bona Gilika againe Afoliyoni. (Egana ana kaivila ma Toluyaweyawela.)

<sup>12</sup> Vita nagona manubutu givhoiyoiyena-ma ahe'i, tu vita luhei ma aimo hinayemu.

*Hiulega anavesikisi ana aiyuve fa'ina.*

<sup>13</sup> Tu bana lobama ana tovenuwa'ata anavesikisi yana hiulega giyuvena, au ago'ago sa'eyana ganogalina, inisenisi ana aba'akabu gola hukuna fowa againe giyemu. Mena aba'akabu Yaubada yana didiga'u'u wamagigine gidadauda.

<sup>14</sup> Bana agona ganogalina-ma tovenuwa'ata anavesikisi yana hiulega gi'abina-ma againe gigahe gigayo, “Badi tovenuwa'ata fowa boi hiyogodi be gufa lakahina ana egana Yufaleta againe himimiyami-ma unayaudi be hinana.”

<sup>15</sup> Au badi tovenuwa'ata fowa boi hida bainadi, hida aiyetai-nadi, hida vaikohi-nadi, hida malamalai-nadi fa'ina Yaubada yana vehimeya againe hikidewedewedi be hisedi amanadi giyaudi be higa kaliva tufoidi moya'aidi hinaluve'alikadi. Tomiyababi adi tufo tohiye ma adi tufo luhei auwe yamumuna tu adi tufo sa'eyana ma hiluve'alikadi. <sup>16</sup> Badi tovenuwa'ata fowa tolugaviya hosi agaidiya hiyage-ma moya'ai-mo'edi hinagoyedi, adi kilagalaga ganogalina 200 miliyoni (200,000,000).

<sup>17-18</sup> Kadu'e yaku eno'ita againe badi tolugaviya yadi hosi agaidiya hiyage-ma ga'itadi, adi ita ma hidede amine. Manawadi ana abaseboda ana ita yabeyabeli-mo'ena vaita ai'ala'alata amine kadu matamatagina vaita lehaga amine kadu yagoyagona vaita luwaluwa boyalina amine. Hosi u'udi ana ita vaita laiyni u'udi amine ada ai nolana

siyo kadu gaitoma yagoyagona alamatafailina magana koyo-mo'ena awadiya giyemuyemu, ada mena aba'alikai-dina agaidiya tomiyababi adi tufo sa'eyana hiluve'alikadi. <sup>19</sup> Badi hosi yadi wafaiwala, u'udiya kadu giudiya kaliva hilu-luve'alikadi fa'ina giudi wa'u'una vaita oloto amine ada medema againe kaliva hi'i'iyovaga.

<sup>20</sup> Tu tomiyababi velugadiyao keke mena vitai-dina agaidiya hida'alika-ma nimadi ana aibubuna ana hawadavadava aimo keke hidavenikohiyeni. Keke Yaubada againe hidahagaviladi. Au Setani yana yo'o higa balauma agaidiya hihawahege-vagahidi kadu ikilukiluma gola, siliva, kofa, kuga, kadu ai agaidiya hibubudi-ma aimo hihawadavadavana. Mena ikilukilumai-dina keke adifaiweya hida'ita o hidanogala o hidanaudadana. <sup>21</sup> Kadu badi kaliva yadi luve'alika yadi kwelikweli yadi udo yadi kai'afu au hida yadi huluvai-dina keke hidavenikohiyeni-yo Yaubada againe hidahagaviladi.

## 10

*Lobama ana tovenuwa'ata be buki uwa'uwana kabi'ona kahihina.*

<sup>1</sup> Kadu'e ga'eno'ita be tovenuwa'ata kikaiwabuna lobama amine gihobuhobu'elama ga'itana. Buhibuhi againe givaigau ada u'una getane bowa gidonena. Magigina ana ita vaita kauwana amine kadu agena ana ita vaita ogola i'ala'alahina amine. <sup>2-3</sup> Buki uwa'uwana kabi'ona luluyagilina gi'abina.

Agena i'atagina lehageya gisena tu i'imawana avaleya gisena, ada gikova'awafatafata agona vaita gufa lakahina gihobu-ma butuna amine. Gikova'awafatafata againe atalai-dina seveni agodi gilakayemu. <sup>4</sup> Ada atala seveni higahe againe, yadi gahe gada'etoladina ma tamo hakwadi agona lobameya ganogalina gigayo, “Badi atalai-dina seveni yadi gahe unasevauyena keke una'etoladini.”

<sup>5-6</sup> Tu bana tovenuwa'ata lehageya be avaleya givagahalahalala be ga'itana-ma nimana i'atagina lobameya gikilakahina be gikova gigayo, “Yaubada gihalamaneku tu gagahegahe, Bana'e Tomiya-vagata lobama be avala be lehaga adi gaitomai-dina matatabudi buye'i gibubudi amanadi ana eganeya gagahe. Boda ana tova a gihavaina. <sup>7</sup> Tu lobama ana tovenuwa'ata anaveseveni yana hiulega ginayuvena ana toveya, Yaubada yana nuwanuwa sevasevauyana ginafaisewa-'owona boi tuwai-mo'ena yana tofaisewa bonana ana to'awatalatalaina agaidiya gihawavemogatalena amine.” Hidedemi tovenuwa'ata buki gi'abina-ma gigahe.

<sup>8</sup> Gigahe-yo ago'ago lobameya ahe ganogalina-ma kadu gigahe-havagileku gigayo, “Una tovenuwa'ata nimane buki luluyagilina gidadauda-ma uvaini, bana lehageya be avaleya givagahalahalala amanadi.” <sup>9</sup> Au gana tovenuwa'ata againe gave'o'ola higa buki uwa'uwana kabi'ona gidaveleku. Ma gigaheku gigayo, “Uvaini be u'ani. Awaniya ana digadigaga vaita ma'awa gufadi amine tu muliya kamoniya ginavegolagola.” <sup>10</sup> Au buki kabi'ona

tovenuwa'ata nimane gavaina be ga'ana. Ana digadigaga awakuya vaita ma'awa gufadi amine tu ahe gatonona againe kamokuya givegolagola. <sup>11</sup> Au higaheku higayo, “Unana Yaubada yana venuwa'ata yo'o moya'aidi adi tokikaiwabu buye'i fa'idiya kadu una'awatalatalaina-havagi. Badi yo'oi-dina meyadi tulina tulina kadu fafali tulina tulina agaidiya himimiyami.” Hidedemi higaheku.

## 11

*Yaubada yana to'awatalatalaina adi'iselu kahi-hidi.*

<sup>1</sup> Tu aiwala giveleku vaita aba'etowava amine ada gigaheku gigayo, “Unana Yaubada yana manuwatafalolo kadu yana atudidiga una'etowavana, kadu tohawadavadava unahawadi. <sup>2</sup> Manuwai-nadi ala gimidifina tu melala ala hinagene ma keke una'etowavani, fa'ina Yaubada badi keke miYuda tu yo'o tulidiyao mena melalai-nadi giveledi. Tu Yelusalema yaku melala mahamahalina ma vaikohi 42 agaidiya hinavehimeyena be gaitoma moya'aidi hinaluyaweyawelidi. <sup>3</sup> Tu yaku to'awatalatalaina adi'iselu ganafaiwalaveledi be yaku venuwa'ata hina'awatalatalainena hinanunauwena aiyeta 1,260 higa vaikohi 42 agaidiya. Adi vaigau koyona vaita kofala baiki amine hina'osena, medema kaliva yadi koyona fa'ina hitagitagi-ma ana iya'iyaya.”

<sup>4</sup> Tu badi to'awatalatalaina adi'iselu ma anafaiweya ai ana egana olive luhei kadu lamufa ana abasewadi luhei babi ana Kaiwabu

matane himidimidi amanadi. <sup>5</sup> Ka'i tamo hakwadi ginagalualuva be ginakivekoyodi, au ai'ala'alata awadiya ginayemu be nibaidiyao gina'ala-'owodi. Hai kaliva nuwanuwana ginakivekoyodi, medema makewa'e hidede amine gina'alika. <sup>6</sup> Kadu badi kalivai-dina adi'iselu vaikohi 42 agaidiya Yaubada yana venuwa'ata hina'awatalatalaina ana toveya yadi faiwala hidede amine. Adifaiweya hinagahe be lobama gina'abodana be keke wehi ginalugaga. Kadu tova a gavaiyehi nuwanuwadi amine, adifaiweya hinagahe be gufa hinavedayaga, kadu vita koyodi tulina tulina babiya hinaseyemaunedi.

<sup>7</sup> Tu badi Yaubada yana venuwa'ata hina'awatalatalaina ginahavaina, kaliva sa'eyana vaita kevakeva manimaninina amine Kahu Tunugi-vadavada'aina againe ginalakayemu be buye hinave'amunumunuga. Bana kevakeva manimaninina ginafaiwalahegedi be ginaluve'alikadi. <sup>8</sup> Wowodi melala lakahina ana egana Yelusalema ana edeya hinasekawowona, melalai-nadi againe tuwaina yadi Kaiwabu hikivekelosena. Mena melala gahe sevasevauyana againe hivewagana Sodoma kadu Idifita. <sup>9</sup> Aiyeta tohiye kadu hafuna agaidiya kaliva moya'aidi hina'ela wowodi hina'itakwanekwanena be adi aitauna hinahawatana. Badi kalivai-dina adi loi tulina tulina kadu adi yo'o tulina tulina, meda meyadi tulina tulina kadu yadi fafali tulina tulina agaidiya hinatauya be hina'ela. <sup>10</sup> Tomiyababi kaliva adi'iselu yadi alika

fa'ina hinagakahikahi, hinavemwamwala be nuwakabubu hinave'atunevedavedama, fa'ina mena Yaubada bonana ana to'awatalatalaina adi'iselu aulolo lakahina tomiyababi hivedi-yo hivedivediwe lauva tunugina.

<sup>11</sup> Aimo ga'eno'eno'ita tu aiyeta tohiye kadu hafuna gihavaina againe, Yaubada yawaina badi agaidiya giya'avedamana be himididi-mo'a. Ada badi hi'itadi-ma himatautave'ine. <sup>12</sup> Au kaliva adi'iselu ago'ago lakahina lobameya hinogalina, gikovadi gigayo, “Walaka'ela we'ai.” Ada buhibuhi againe lobameya hilakalaka tu nibaidiyao hilulubodedi.

<sup>13</sup> Lobameya hiluku tu auhe'ama babi gili'uli'u toyogi-mo'ena ada kaliva seveni tausani (7,000) hi'alika. Hida melalai-nadi ana tufo teni ada naeni auwe yamumuna tu ana tufo sa'eyana againe manuwa hibe'u. Badi li'uli'u againe wayawaidi himimiyami-ma himatautave'ine be Yaubada lobameya yana faiwala fa'ina hidavada-vana.

<sup>14</sup> Vita anavelu manubutu givehoiyoiyena-ma ahe'i, tu vita anaveto kabisona ginalakayemu.

*Hiulega anaveseveni ana aiyuve fa'ina.*

<sup>15</sup> Tu bana lobama ana tovenuwa'ata anaveseveni yana hiulega giyuvena, au ago'ago lakahidi lobameya hikovakova higayo, Tova adamoya yada Kaiwabu kadu yana Tovegida  
Keliso  
abavehimeya babi againe hivai-havagilena,



ada tomiyababi hinavehivehimeyedi tova inaga  
inaga

keke ana abalauyabu.

<sup>16</sup> Hidedemi higahe-yo tomiyalobama adi  
tonagona tuweniti-fowa yadi didiga'u'uya  
Yaubada matane hivetogadi-ma hi'ibo'ula-mo'a  
be Yaubada hihawadavadavana higayo,

<sup>17</sup> O Yaubada Kaiwabu Tofaiwala-mo'a,  
tuwaina umiyami be ununauwena tu  
adamoya aimo umiyamiya-vagata.

O againiya avesivesiule fa'ina  
ya faiwala lakahina uvai-vagahina  
be uvebutu uvehivehimeya.

<sup>18</sup> Yo'o moya'aidi O againiya hi'ago'uga  
fa'ina ya ila'a ana tova a gilakayemu  
be to'alika unavedewayaugidi.

Kadu ya tofaisewa bona ana to'awatalatalaina  
adi laufata ana tova a giyemu.

Meda ya kaliva mahamahalidiyao  
kadu gaveyao a egana hive'amohimohinena  
lakahidiyao kadu kabi'odiyao,  
medema adi laufata ana tova a giyemu.

Tu badi tomiyababi hiluyaweyawelidi-ma  
adi veluyauyaula ana tova a gilakayemu.

Au hidedemi tomiyalobama adi tonagona yadi  
kwelidavadava.

<sup>19</sup> Kadu'e ga'eno'eno'ita tu matakuya Yaubada  
yana manawa-tafalolo lobameya hiyauna, ada  
manuwa hinagene Yaubada yana veyao ana  
bokesi ga'itana. Auhe'ama nama gisisinamana,  
butuna gilaulauga, atala gihegehegena, babi

gili'uli'u, wehi kugakugana vaita aisi amine gi'alilihwana.

## 12

### *Kwamayoku be wayo'o fifiwalana kahihidi.*

<sup>1</sup> Kadu'e ga'eno'ita tu iya'iyaya lakahina kadu yaulyowogina lobameya gilakayemu, higa kwamayoku kauwana againe givaigau ada vaikohi tabone gimidimidi. Badau kikaiwabuna ibadibadi tuwelo buye hikivefotadi-ma u'une ga'itana. <sup>2</sup> Bana wahifugana ada givefahena fa'ina yana aulolo giyemu againe gitatawayana. <sup>3</sup> Au kadu iya'iyaya velugana lobameya gilakayemu, higa wayo'o abokakaina yabeyabelina u'una seveni ana siko seveni kadu badau kikaiwabuna seveni meda u'una seveni agaidiya gidadauda-ma ga'itana. <sup>4</sup> Giuna againe ibadibadi tufoidi moya'aidi gilukakikakidi be babiya hibe'u. Ibadibadi adi tufo tohiye ma adi tufo luhei auwe yamumudi tu adi tufo sa'eyana ma babiya gihegehobuyena. Bana wayo'o-nadi kwamayoku kabisona ginavenatuna-ma wamagigine gimidi be higa kwamana ginatubuga digo auhe'ama ginatonona. <sup>5</sup> Au hivenatuna natudi kaliva, Bana'e aimo yana wafuluma kainumula yo'o tulina tulina gina'itave'avididi amanadi. Wayo'o-nadi kwamana gidatonona ma tamo hakwadi gilemana be Yaubada againe kadu yana didiga'u'u buye againe ginawena. <sup>6</sup> Badi kwamayoku ma babigaga againe hi'ota,

---

**11:19:** 1Ko 15:24-25, Ha 19:6, Dan 7:13-14 Ha 4:4,9-10 **11:19:** Ha 1:8, 20:11-13, 2Ko 5:10

abaga sa'eyana badi fa'idiya boi Yaubada gikidewedewena-ma againe hina. Medede againe aiyeta 1,260 agaidiya gina'ita'itave'avidu.

<sup>7</sup> Kwamayoku hi'ota be hina tu gaviya lobameya gilakayemu. Lobama ana tovenuwa'ata kikaiwabuna ana egana Maikeli yana yo'o ginagoyedi be wayo'o yana yo'o tomiyalobama buye hive'amunumunuga. <sup>8</sup> Lobama ana tovenuwa'ata Maikeli ginagoyedi-ma wayo'o hifaiwalahege-mo'ena, ada Yaubada bana wayo'o yana yo'o buye yadi abaga lobameya gilemadi be giwavidi. <sup>9</sup> Bana wayo'o abokakaina babiya gihegehobuyena, bana'e ma oloto tuwaina hivewagana Diyabolo yo Setani, tomiyababi matatabudi koyona againe ginuwa'abiyedi-ma kalivai-nadi. E, bana'e babiya hihegehobuyena kadu yana yo'o tomiyalobama buye'i.

<sup>10</sup> Setani babiya hihegehobuyena tu ago'ago lakahina lobameya ganogalina gikova gigayo, Adamoya yada Yaubada gikibababaleda, Yada Tokaiwabu yana faiwala gi'ivemogatalina be yana itave'avina againe kamimiyami. Adamoya yana Tovegida Keliso yana abavehimeya giseyemaunena. Setani babiya hihegehobuyena, boi uyadayada be bogi tobohiyadeyao Yaubada matane gihawavekoyoye-kawowodi.

<sup>11</sup> Bana'e Sifi kabi'ona dayagina gimadu fa'ina tobohiyadeyao Setani hifaiwalahege-mo'ena Kadu yadi yegayega Yesu dayagine mali kaliva agaidiya hi'awatalatalainena fa'ina Setani hifaiwalahege-mo'ena,

yawaidi keke hidanuwalololeni  
 au alikeya hihawahegedi.

<sup>12</sup>Yaubada gifaiwalahegahega-mo'a fa'ina  
 omi tomiyalobama wanavemwamwala.

Tu hoiyoi, omi tomiyababi tomiyalehaga  
 fa'ina Setani agaimiya gihobu'ela.

Ila'a givemagana be vita ginavelemi

fa'ina gihalamanena yana tova a gikali'uho.

Au hidedemi ago'ago lobameya gigahe.

<sup>13</sup>Tu bana wayo'o-nadi babiya hihegehobuyena  
 ma tauna gi'itana againe, kwamayoku  
 kwamana kaliva hivenatunena-ma givenegadi.

<sup>14</sup>Gidakive'avididi ma Yaubada manubutu ofana  
 luhei kwamayoku givedi be higa abaga  
 babigaga againe badi fa'idiya gikidewedewena-  
 ma againe adifaiweya hinamadu'ota. Medede  
 againe malamala tohiye kadu hafuna agaidiya  
 gina'ita'itave'avididi be bana wayo'o-nadi keke  
 anafaiweya ginamunudi. <sup>15</sup>Au wayo'o awana

gila'ana ada gufa lakahina gi'ahiwahiwana be  
 higa kwamayoku ginave'alugedi. <sup>16</sup>Tu badi

kwamayoku givelugadi. Badi gi'ayavalina be gufa  
 wayo'o awane gi'alahiwigena-ma badi giyuna.

<sup>17</sup>Au wayo'o kwamayoku agaidiya gi'ago'uga-  
 mo'a ada gitauya be natudiyao velugadiyao  
 agaidiya ginalulugaviya. Badi kalivai-dina

Yaubada yana vehimeya hi'ita'itave'avina kadu  
 nuwanuwa velemono'ena Yesu gi'awatalatalainena-  
 ma againe hiluluve'avina. <sup>18</sup>Au wayo'o gina

taliyeya gimidi tu gibodaboda.

---

**12:18:** Yo 14:30 Sam 2:9 Yu 1:9 Aba 3:1, Ha 20:2-3

1:9-11, Sak 3:1 Yo 1:7 1Fi 5:8

**12:18:** Yob

# 13

*Kevakeva manimaninidiyao adi'iselu kahihidi.*

*Sa'eyana lehageya giyemu.*

<sup>1</sup> Bana kaliva vaita wayo'o amine ma taliyeya gimidimidi tu kadu kaliva sa'eyana ana ita vaita kevakeva manimaninina lehageya gi'alakahina-ma ga'itana. Kevakevai-nadi u'una seveni kadu ana siko teni, ada siko sa'eyana sa'eyana agaidiya badau kikaiwabuna hidadauda. Kadu u'una sa'eyana sa'eyana agaidiya egana koyodi hidadauda, eganai-dina Yaubada hihawatagona.

<sup>2</sup> Kevakeva manimaninina ga'itana-ma ana ita vaita fusi walawala'a abokakaina ana egana lefadi amine, tu agena vaita kevakeva koyona ana egana beya agena amine, ada awana lakahina vaita laiyoni awana amine. Bana wayo'o yana faiwala yana didiga'u'u yana abavehimeya lakahina kevakevai-nadi manimaninina againe gisedamanena. <sup>3</sup> Bana kevakeva u'une vaita ki'ona gidadauda, higa boi gi'alika tu kadu gimididi-havagi. Tomiyababi moya'aidi yana mididi-havagi fa'ina hiyaulowoga be yana vehimeya hi'itavaina.

<sup>4</sup> Bana wayo'o yana abavehimeya kevakeva manimaninina againe gisedamanena fa'ina, kaliva wayo'o hihawadavadavana kadu kevakeva manimaninina hihawadavadavana higayo, "Mene tamo hakwadi kevakeva manimaninina amine? Keke tamo hakwadi anafaiweya bana againe ginalaugaviya, keke-mo'a."

<sup>5</sup> Tu vaikohi 42 agaidiya Yaubada kevakeva manimaninina gihawahegena be giseselakalaka

kadu Yaubada gihawahawatagona, ada yana wa'abavehimeya gififaisewa. <sup>6</sup> Nuwanuwana tauna ginakilakahina vaita Yaubada amine fa'ina givebutu Yaubada Tauna gihawatagona, Yaubada ana egana kadu yana abamiyami kadu yana kaliva tomiyalobama gi'ihawadamanedi. <sup>7</sup> Yaubada gihawahegena be yana kaliva mahamahalidiyao agaidiya ginalugaviya be ginafaiwalahege-mo'edi. Ada yo'o tulina tulina ginavehivehimeyedi, adi loi tulina tulina meyadi tulina tulina yadi fafali tulina tulina. <sup>8</sup> Tomiyababi tufoidi moya'aidi kevakevai-nadi manimaninina hinahawadavadavana, higa gaveyao moya'aidi Sifi kabi'ona yana buki againe adi egana keke gida'etoladini, medema hinahawadavadavana. Buki-nadi Sifi kabi'ona yana buki, Bana'e tuwai-lokalokana Yaubada aimo babi keke gidabubuni ana toveya yana vevai againe alika ginanuhagana amanadi. Ada buki againe badi wayawai-vagahidi adi egana gidadauda.

<sup>9</sup> Omi watagami, wananogala. <sup>10</sup> Hai kaliva Yaubada ginahawahegena be Keliso fa'ine deliya ginaluku, medema makewa ginaluku. Hai kaliva Yaubada ginahawahegena be Keliso fa'ine fetu againe alika ginanuhagana, medema makewa gina'alika. Hidema fa'ina omi Yaubada yana kaliva mahamahalimiyao yami wa'asevatu wana'atufefa'ila, yami vetumagana wanakidonena.

*Kevakeva kadu sa'eyana babiya giyemu.*

<sup>11</sup> Kadu'e ga'eno'ita tu kevakeva manimaninina velugana babiya giyemu-ma ga'itana. Ana siko luhei vaita sifi kabi'ona ana siko amine tu agona ma fifiwalana vaita wayo'o amine.

<sup>12</sup> Bana kevakeva manimaninina nagona yana abavehimeya matatabuna bana kevakeva manimaninina anavelu againe gisedamanena, ada loseyanina amine tomiyababi moya'aidi givehivehimeyedi. Giluluya'aya'alidi be kevakeva manimaninina nagona hihawadavadavana, bana gi'alika tu gimididi-havagi ma kalivai-nadi.

<sup>13</sup> Kadu iya'iyaya lakahidi be yauyaulowogidi gififaisewadi, e yana faiwala againe ai'ala'alata lobameya gisehobuyena kaliva moya'aidi matadiya.

<sup>14</sup> Bana kevakeva manimaninina anavelu bana kevakeva manimaninina nagona ana eganeya mena iya'iyaya yauyaulowogina gififaisewana, fa'ina yana ve'alololoya tomiyababi ginuwa'abiyedi. Kadu givehimeyedi gigayo, "Ikilukiluma bana kevakeva manimaninina nagona boi feto againe gi'alika tu gimididi-havagi ma ana ita amine wanabubuni-yo wanakivemididina be againe wana'ibo'ula." Hidedemi gigahe.

<sup>15</sup> Hibubuna gihavaina, Yaubada gihawahegena fa'ina kevakeva manimaninina anavelu yawaina ikilukilumai-nadi againe giya'avedamana, ada mena ikilukiluma ana ita vaita kevakeva manimaninina nagona amine ma anafaiweya gilulukahihi kadu yana vehimeya againe gaveyao moya'aidi ikilukiluma ana hawadavadava hidibutoyogena-ma hiluve'alikadi.

<sup>16</sup> Kadu kaliva moya'aidi giluya'aya'alidi, lakahidiyao be

kabi'odiyao, wakalivadiyao be koyokoyodiyao, agetoga yadi kauve'a buye'i giluya'aya'alidi be iya'iyaya sa'eyana i'atagidiya o ka'i deba'aidiya hivaina. <sup>17</sup> Badi gaveyao iya'iyayai-nadi keke hidavaini, medema keke adifaiweya lokoloko hidakimoneni o hidakimonevedamaneni. Mena iya'iyaya amanadi kevakeva manimaninina nagona ana egana o ka'i bana ana egana ana naba.

<sup>18</sup> Tobohiyakweyao, gilubodami be yami wanuwahuya mena gaitomai-nadi wananuwenuwena. Kevakeva manimaninina ana naba vaita gahesevauya amine. Ana naba 666. Hai kaliva halamanina, medema gahesevauya ana kaivila fa'ina anafaiweya gidanuwanuwa be egana-mo'ena gidanuhagana. Mena eganai-nadi kevakeva manimaninina ana egana tu egana ana nogala ma vaita kaliva ana egana amine.

## 14

*Sifi Kabi'ona yana kalivamomo buye himiyami oya Saiyoni.*

<sup>1</sup> Kadu'e ga'eno'ita tu auhe'ama Sifi kabi'ona mene matakuya ga'itana, Bana oya Saiyoni kabune gimidimidi, oyai-nadi Yelusalema hinagene gidadauda. Kadu badi kaliva 144,000 Sifi kabi'ona buye himidimidi, deba'aidiya Bana ana egana kadu Tamana ana egana kilukilumina gidadauda. <sup>2</sup> Ada ago'ago lobameya ganogalina, ana nogala vaita gufa lakahina gihobuhobuma amine, kadu vaita atala gihegena toyogina



ma amine. Ago'ago ganogalina-ma kadu ana nogala vaita yo'o lakahidi hikwelikweli tu yadi kweli ana aba'veyamumu vaita kita hagihagina amine hilaulauna. <sup>3</sup> Mena yo'oi-dina kaliva 144,000 Yaubada yana didiga'u'u wamagigine kadu gaitoma wayawaidi fifiwaladiyao adivefowa be tonagona lakahidiyao matadiya himidimidi tu kweli ivaguna hikwelikweliyena. Kweli-nadi keke tamo hakwadi anafaiweya ginanogalavaini, au badi kaliva 144,000 gagana hihalamanena. Badi kalivai-dina Yaubada babi ana koyona againe gitutuehobudi. <sup>4</sup> Yadi dewa hagihagi-mo'ena Yaubada matane. Kaliva vavinediyao keke hidahegedi-yo mali vevine hidakeleleyedi amine, badi kaliva 144,000 keke Yaubada hidahegeni-yo mali yaubada agaidiya hida'odu'odu. Ha'amine ha'amine Sifi kabi'ona ginanauna, badi hivebwa'uliyena. Yaubada tomiyababi adi yo'o agaidiya gitutuehobudi ada Yaubada kadu yana Sifi kabi'ona badi kalivai-dina vaita bavagu amine hinuhagadi. <sup>5</sup> Kadu badi kalivai-dina keke tamo fwaya awadiya gidayemuyemu, au adi vita keke.

*Lobama ana tovenuwa'ata adi'itoto kahihidi.*

<sup>6</sup> Kadu'e ga'eno'ita tu lobama ana tovenuwa'ata sa'eyana lobama hinafane giyaveyavega-ma galitana. Bana Yaubada yana Venuwa'ata Yamumuna miyamiya-vagahina gi'aliyena be tomiyababi agaidiya gina'awatalatalainena. E, fafali tulina tulina kadu yo'o tulina tulina agaidiya gina'awatalatalainena, kaliva meyadi tulina

tulina, adi loi tulina tulina. <sup>7</sup> Bana tovenuwa'ata gikova'awafatafata gigayo, “Yaubada wanamatausena kadu wanakivekaiwabuna, fa'ina yana vedewayauga ana tova a gilakayemu. Bana'e lobama, babi, lehaga, guya gibubudi-ma wanahawadavadavana.”

<sup>8</sup> Tu tovenuwa'ata anavelu tobohiyana muline giyemu gikova gigayo, “Babiloni hida hima melala lakahina hiluyawelina, hiluyaweli-mo'ena. Melalai-nadi ana dewa koyona ada nuwanuwa ita'italuvadigana yo'o tulina tulina kalivai-dina nuwadi gi'abina be melalai-nadi againe hiluku. Wa'ita, kwamayoku kaliva higayena be gufa laulaugina hiveyuni-yo givekwavakwava tu buye hi'udo amine, meda kaliva moya'aidi melalai-nadi againe udo tulina tulina agaidiya hihawahegedi.”

<sup>9-10</sup> Tu tovenuwa'ata anaveto tobohiyaneyao mulidiya giyemu gikova'awafatafata gigayo, “Gava kaliva kevakeva manimaninina be ana ikilukiluma ginahawadavadavadi kadu yana iya'iyaya deba'aine o i'atagine ginavaina, kadu medema Yaubada yana ila'a ana gowa ginayuyena. E, kaliva oine uyonaga gihiwana amine, Yaubada yana ila'a keke-mo'a ginakivetuluni, au mena kaliva koyodiyao yana ila'a toyoginaga hina'ayaunena. Kadu lobama ana tovenuwa'ata mahamahalidiyao matadiya kadu Yaubada yana Sifi kabi'ona matane gaitoma yagoyagona alamatafailina giyabeyabela-ma againe aulolo keke kabi'ona hinanuhagani-yo hinavedivediwe. <sup>11</sup> Mena ai giyabeyabela-yo aulolo hinuhagana-ma ai-nadi

siyona gilutowamididiyena tova inaga inaga keke ana abalauyabu. Medema fa'ina gaveyao bana kevakeva manimaninina kadu ana ikilukiluma buye hihawadavadavadi o ka'i ana egana ana iya'iyaya hivaina, medema yadi aulolo keke-mo'a gida'aloveni. E, uyadayada be bogi hivedivediwevagata.” Hidedemi tovenuwa'ata anaveto gigahe.

<sup>12</sup> Tu badi kevakeva manimaninina ana hawadavadava againe mena aulolove'ine hinanuhagana fa'ina, omi Yaubada yana kaliva mahama-halimiyao yami wa'asevatu wana'atufefa'ila, omi Yaubada yana vehimeya wa'ita'itave'avina kadu yami vetumagana Yesu againe wakidonena-ma kalivai-mina.

<sup>13</sup> Au ago'ago lobameya ganogalina gigaheku gigayo, “Hidedemi u'etoladini. Adamoya kadu ginanunauwena gaveyao Kaiwabu againe hinamiyamiyave'avina tu hina'alika, yadi vemwamwala gavatubuga!”

Ada Bana Yaubada Alu'aluwana gi'alakakila gigayo, “Wona velemona, au yadi faisewa ana wavita againe hinaveyawai tu guwana lobameya hinanauwena be moy'a'aidi matadiya adi laufata haghagina hinanuhagana.”

*Lobama ana tovenuwa'ata tomiyababi hivaidi be*

*adi laufata hinanuhagana.*

<sup>14</sup> Kadu ga'eno'ita tu mene matakuya buhibuhi kwayakwayana ga'itana, ada buhibuhi againe kaliva sa'eyana givetogana ana ita vaita Bana'e

givekaliva-ma amine. Badau kikaiwabuna gola u'une gidadauda kadu ilama tubu'oduna sinasinahina gi'abina. <sup>15</sup> Au kadu tovenuwa'ata velugana manuwa-tafalolo againe gihobu ada Bana buhibuhi againe givetogana-ma againe gikova'awafatafata gigayo, “Gaitoma moya'aidi babiya giboyalidi fa'ina yaudi ana tova ahe gilakayemu. Au ya ilama tubu'oduna uvaini be utalaga.” <sup>16</sup> Hidedemi gigahe-yo Bana buhibuhi againe givetogana-ma yana ilama tubu'oduna babiya giwainena be yana kaliva vaita hiboyala-ma giyaudi.

<sup>17</sup> Kadu'e tovenuwa'ata velugana manuwa-tafalolo lobameya gidadauda-ma againe gihobu ada kadu bana ilama tubu'oduna sinasinahina gi'abina. <sup>18</sup> Kadu tovenuwa'ata sa'eya-mo'ena manuwa-tafalolo ana atudidige ya gitauya, bana atudidiga ana ai'ala'alata ana tovehimeya ma kalivana, gihobu be bana tovenuwa'ata ilama tubu'oduna sinasinahina gi'abina-ma againe gikova'awafatafata gigayo, “Gava babiya kelef i hiboyala fa'ina, ya ilama uvaini be utalaga-yo oine hinabubuna.” <sup>19</sup> Au bana tovenuwa'ata yana ilama tubu'oduna babiya giwainena digo babi ana kelef i giyaudi au kelef i ana abavagafuwafuwa againe ginauwedi be giselukuwedi. Mena abavagafuwafuwa vaita Yaubada yana ila'a ana abanauhaga, ada medema againe tomiyababi Yaubada yana ila'a hinanuhagana. <sup>20</sup> Mena abavagafuwafuwa melala lakahina wakwaune gidadauda ada medede againe kelef i hivagafuwafuwadi. Hivagavagafuwafuwadi tu tomiyababi dayagidi

gimadumadu gimadumadu tu gituwa yana laka badi miGilika yadi etowava amine 1,600 sitediya, higa vaita 300 kilomita amine. E, dayagidi yana laka tunugi-mo'ena, keke adafaiweya kanamidiluvani.

## 15

*Lobama ana tovenuwa'ata seveni vita koyo-mo'ena*

*babiya hihegehobuyena.*

<sup>1</sup> Dayaga lakahina ga'itana gihavaina, kadu gavadi aimo ginalakayemu ana iya'iyaya ga'eno'itayena. Mena iya'iyayai-nadi ma lakahina kadu yauyaulowogina. Tovenuwa'ata seveni ga'itadi ada nimadiya vita koyo-mo'edi seveni hidadauda, vitai-dina agaidiya tomiyababi matahiwadi hinanuhagana. Ada mena vitai-dina babiya hinahegehobuyeni-yo kaliva hinakivekoyodi be medema againe Yaubada yana ila'a ginahavaina, ginahavai-mo'ena.

<sup>2</sup> Kadu ga'ita tu tamo gavadi ana ita vaita lehaga atumanamanahina amine tu hinagene giyabela vaita ai'ala'alata amine ga'itana. Mena lehaga liline kaliva moya'aidi ga'itadi, badi hifaiwalahegahega-mo'a be kevakeva manimaninina ana ikilukiluma buye kadu ana egana ana naba hidibutoyogedi. Kweli ana aba'iveyamumu vaita kita hagihagina amine Yaubada giveledi-ma hi'abina. <sup>3</sup> Moya'aidi hikwelikweli, yadi kweli ma Mosese Yaubada

yana tofaisewa againe kadu Yaubada yana Sifi kabi'ona againe give'inuba. Kweli hidede amine. Yaubada Kaiwabu O Tofaiwala-mo'a Ya gugai lakahidi, keke kanawona. O yo'o tulina tulina adi Tokaiwabu, Ya dewa tunutunugina kadu velemona. <sup>4</sup> Ho Kaiwabu kaliva moya'aidi O hinamatause kadu a egana hinakivekaiwabuna. O akaibe'u-mo'a mahamahali, Yo'o moya'aidi againiya hina'ela yadi wave'amohimohina hina'ibo'ula, fa'ina ya laufata tunutunugina u'ivemogatalina be ka'itana. Au hidede amine hikwelikweli.

<sup>5</sup> Yadi kweli ganogalina tu kadu ga'ita, Yaubada yana manuwa-tafalolo lobameya hiyauna ada hinagene Yaubada yana abamiya hivewagana Vetawana Tabu-mo'a ma ga'itana. <sup>6</sup> Au lobama ana tovenuwa'ata seveni vita koyo-mo'ena seveni hi'abina-ma manuwa-tafalolo againe hihobu. Kaleko kwayakwayana ve'akinamanamalina againe hivaigau ada niniwala gola manawadiya hihifona. <sup>7</sup> Au gaitoma wayawaidi fifiwaladiyao adivefowa ana kaliva sa'eyana nau'a gola seveni givaidi be tovenuwa'ata seveni giveledi. Mena nau'a Yaubada Tomiya-vagata yana ila'a againe himaga. <sup>8</sup> Giveledi tu Yaubada yana mahalina ve'akinamanamalina kadu yana faiwala siyo amine manuwa-tafalolo ana vetawana gibabalina be keke tamo hakwadi anafaiweya gidaluku tu nagona tovenuwa'ata seveni vita koyo-mo'ena seveni babiya hinahege-'owona.

# 16

*Yaubada yana ila'a nau'a seveni givemagadi-ma kahihina.*

<sup>1</sup> Tu Yaubada yana mahalina ve'akinamanamalina yana manawa gibabalini-yo ago'ago lakahina manawa-tafalolo againe giyemu-ma ganogalina. Badi lobama ana tovenuwa'ata adiveseveni agaidiya gigaye gigayo, “Wanana be Yaubada yana ila'a wanau'adi seveni babiya wanabihiwana.” <sup>2</sup> Au bana tovenuwa'ata nagona gina yana nau'a babiya gibihwana tu tomiyababi kevekeve manimaninina yana iya'iyaya hivaina kadu ana ikilukiluma hihawadavadavana-ma agaidiya koliya lakahina wamagana kadu wa'aulolona gi'afolefoledi.

<sup>3</sup> Tu tovenuwa'ata anavelu yana nau'a lehageya gibihwana tu givedayaga vaita to'alika dayagidi gufagufana amine, ada gaitoma moya'aidi wayawaidi lehageya himimiyami-ma hi'alika.

<sup>4</sup> Tu tovenuwa'ata anaveto yana nau'a gufa lakahidi kadu guya agaidiya gibihwana tu hive-dayaga. <sup>5</sup> Gibihwani-yo tovenuwa'ata kadu sa'eyana, bana gufa ana to'itave'avina yana gahe ganogalina gigayo,

O Yaubada, Kaliva mahamahali,  
tuwaina umiyami kadu adamoya umimiyami.  
O uvehimeya be tomiyababi mena matahiwadi hinuhagana. Adi laufata uveledi-ma tunutunugina.

<sup>6</sup> Ya yo'ogaga kalivai-dina kadu  
O bona ana to'awatalatalaina himunudi  
be dayagidi gimadu.

Ada au gufa givedayaga-ma againe uveyudi

Yadi koyona gilubodadi amine.

Au hidedemi gufa ana to'itave'avina gigahe.

<sup>7</sup> Ada ago'ago sa'eyana Yaubada yana atudidigeya  
giyemu-ma ganogalina gigayo,

Ehe, Yaubada Kaiwabu O Tofaiwala-mo'a,

ya laufata velemo'ena kadu tunutunugina.

<sup>8</sup> Gigahe-yo tovenuwa'ata anavefowa  
yana nau'a kauwana againe gibihiwana tu  
Yaubada kauwana gikivegivegina-mo'ena  
ada vaita ai'ala'alata amine tomiyababi  
gi'alahidi. <sup>9</sup> Kauwana gilukalalava vaita ai

ma gi'alahidi, au hi'ago'uga be Yaubada ana  
egana hihawatagona, Bana yana abavehimeya  
againe vitai-dina hidadauda-ma Kalivai-nadi.  
Atu nuwavilana hidibutoyogena be keke Yaubada  
hidakivekaiwabuni.

<sup>10</sup> Tu tovenuwa'ata anavefaifi yana nau'a ke-  
vakeva manimaninina yana didiga'u'u againe  
gibihiwana tu yana abavehimeya matatabuna  
gi'uyuyuna. <sup>11</sup> Yana kaliva hi'aulolove'ine fa'ina  
meyadi hiyovayovana ada yadi aulolo kadu adi  
koliya lakahina fa'ina Yaubada lobameya hi-  
hawatagona. Atu nuwavilana hidibutoyogena be  
keke yadi dewa koyona hidavenikohiyeni.

<sup>12</sup> Tu tovenuwa'ata anavesikisi yana nau'a gufa  
lakahina ana egana Yufaleta againe gibihiwana  
tu gufa gi'ahalina be tokikaiwabu yadi tolu-  
gaviya buye lauhanaga amine hina'ela-ma yadi

---

**16:11:** Ha 16:17, Sef 3:8 Yem 9:10, Ha 13:11-17 Yem 7:17-21

**16:11:** Ha 17:6, 18:24 Ha 19:2 Ha 9:20-21 Yem 10:22



eda gikidewedewena. <sup>13</sup> Au balauma koyodiyao adi'itoto adi ita vaita kalikali amine ma ga'itadi. Bana kaliva vaita wayo'o amine kadu bana kevakeva manimaninina kadu bana falofita ve'alololona, (higa mena kevakeva manimaninina ana nimavelu), awadiya kalikali-dina hiyemu.

<sup>14</sup> Mena balauma Setani yana yo'o kalivai-dina ada fafali moya'aina adi tokikaiwabu matadiya aituha fifiwaladi hififaisewadi. Hidedemi hinuwa'abiyedi be lugaviya fa'ine hivaga'auhidi ada mena tokikaiwabu moya'aidi Yaubada Tofaiwalamo'a yana tova lakahina againe hinalugaviya.

<sup>15</sup> Tu Iya Yesu ganagahe. “Tokai'afu gi'elakau amine Iya gana'ela ganaveyaulowogimi. Hai kaliva Iya fa'ikuya ginavanevanenega kadu ana vaigau keke ginavehalilini tu yana dewa gina'itave'avina, medema aimo yana vemwamwala gavatubuga! Au keke vaita konekonena amine kaliva matadiya yana wawowomumu ginamiyami.”

<sup>16</sup> Hidedemi Yesu yana gahe giyemu tu balaumai-dina koyodiyao kadu ganalukahihiyedi. Au balauma badi tokikaiwabu lauhanaga amine hina'ela-ma higahedi be fafali bona Hibeliu againe hivewagana Amagedoni againe hivaga'auta.

<sup>17</sup> Tu tovenuwa'ata anaveseveni yana nau'a hivega lobama hinafane gi'etohiwana. Auhe'ama ago'ago lakahina Yaubada yana didiga'u'uya gikova. Mena didiga'u'u manuwatafalolo hinagene gidadauda. Ada gikova'awafatafata gigayo, “Ahe'i! Yaubada yana ila'a wanau'adi matatabudi ahe hibihiwadi.” <sup>18</sup> Auhe'ama

nama gisisinamana, butuna gilaulauga, atala gihegehegena kadu babi gili'uli'u lakahi-mo'ena. Tuwai-mo'ena Yaubada kaliva gimidibubuna ana toveya be ginauwena tova adamoya babi keke tamu tova hidede amine gidali'uli'u toyogina. <sup>19</sup> Au melala lakahina gili'uyavalina ana tufo tohiye au gihavaina. Kadu fafali tulina tulina ana melala matatabudi gili'uyaweyawelina. MiBabiloni higa melala lakahina kalivai-dina yadi koyona moya'aina Yaubada ginuwanaunauyena be yana vehimeya againe yana ila'a lakahi-mo'ena ana gowa hiyuyena. <sup>20</sup> Himula matatabudi hiyawowola kadu oya moya'aidi gili'uvekavivilidi. <sup>21</sup> Wehi kugakugana vaita aisi amine, kugai-nadi abokakaina ana vita vaita bawe halahalana amine (higa 50 kilo) lobameya gi'alilihiwana be kaliva gifihafihadi. Ada mena vita koyo-mo'ena fa'ina, kaliva Yaubada hihawahawatagona, fa'ina vitai-nadi koyona, koyo-mo'ena.

## 17

*Kwamayoku yamayamadadi kevakeva manimanina*

*againa hiyage-ma kahihidi.*

<sup>1</sup> Tu mena vita anaveseveni ana tova gihavaina, bana tovenuwa'ata adiveseveni wanau'adi seveni adi yo'o kalivana agaikuya gi'ela gigaheku gigayo, “U'ela be kana melala kikaiwabuna gufa moya'aidi lilidiya hive'alahina-ma ana

matahiwadi ganavehawale. Melalai-nadi vaita kwamayoku lakahidi yamayamadadadi amine. <sup>2</sup> Fafali tulina tulina ana tokikaiwabu Yaubada hivekwaulaugena fa'ina yadi huluva vaita badi buye hida'udo'udo kadu yadi nuwanuwa koyodi tomiyababi moya'aidi nuwadi givaina, higa vaita yadi udo ana oine hiyuyena be hivekwavakwava.” Hidedemi tovenuwa'ata gigaheku.

<sup>3</sup> Tu Yaubada Alu'aluwana giluvaiyeku-yo tovenuwa'ata babigaga againe ginauweku. Medede againe kwamayoku sa'eyadi kevakeva manimaninina yabeyabelina kwaune hivetogadi-ma ga'itana. Kevakevai-nadi u'una seveni kadu ana siko teni kadu wowona matatabuna againe egana koyodi hidadauda, egana-dina Yaubada hihawatagona. <sup>4</sup> Kwamayoku kaleko likelikenana kadu yabeyabelina againe hivaigau vaita wakwamayokudi, kadu vaigau tulina tulina hivigauyena, gola, kabala ve'akinamanamalidi, bidi fatana lakahina. Gowa gola againe hibubunama hi'abina, gowai-nadi dewa moya'aidi koyodi Yaubada givenikohiyedi-ma agaidiya gimaga, kadu yadi udo tulina tulina ana bwanene againe gimaga. <sup>5</sup> Badi deba'aidiya kwamayoku adi egana hi'etoladina ada adi egana ana halamana vitana vaita gahesevauya amine. Adi egana hidede amine.

Hida hima Babiloni melala lakahina.

Badi'e ma yamayamadadadiyao hinadi

kadu babi ana dewa koyodi moya'aidi

badi hivenatunedi.

<sup>6</sup> Badi kwamayoku ga'itadi-ma adi ita vaita gufa laulaugina hidayu-fa'ila yo hidavekwavakwava. Gufai-nadi ma Yaubada yana yo'ogaga kalivai-dina dayagidi, badi Yesu againe hiluve'avina fa'ina dayagidi gimadu-ma kalivai-dina. Kwamayoku ga'itadi againe gayaulowoga-mo'a. <sup>7</sup> Bana tovenuwa'ata gitoliyeku gigayo, "Gavadi-yo hidede amine uyaulowoga? Hida kevakeva manimaninina u'una seveni ana siko teni kadu kwamayoku kwaune hivetogadi-ma fa'idiya ganakivetuvetunu. Badi adi halamana sevasevauyana tu againiya ganalukahihiyena. <sup>8</sup> Hida kevakeva manimaninina u'itana-ma tuwaina gimiyami, adamoya keke wayawaina gidamiyami tu aimo tova mulina Kahu Tunugi-vadavada'aina balauma yadi abageya ginalakayemu be ana agolaufofola ginanuhagana. Tuwai-lokalokana Yaubada aimo babi keke gidabubuni ana toveya, kaliva tufoidi yawai-vagahidi ginaveledi-ma adi egana yana buki againe gi'etoladina. Tu badi tomiyababi adi egana keke gida'etoladini-ma kevakevai-nadi manimaninina hina'itana againe hinayaulowoga, fa'ina tuwaina gimiyami, adamoya keke wayawaina gidamiyami tu tova mulina ginayemuna-havagi.

*Kivetuvetunu kahih-nadi ana nuwanuwa fa'ina.*

<sup>9</sup> Tobohiyaku, giluboda be ya wanuwahuya mena gaitomai-nadi unanuwenuwena. Ana nuwanuwa hidede amine. U'una seveni au oya seveni kwamayoku hivetogadi-ma

oyai-dina higa oya seveni kabune melala hive'alahina. <sup>10</sup> Kadu mena u'una seveni ana nuwanuwa sa'eyana ma tokikaiwabu seveni. Tokikaiwabu adivefaifi yadi abavehimeya gihavaina, tova adamoya bana anavesikisi givehivehimeya tu bana anaveseveni aimo keke gidalakayemu. Tu ginalakayemu againe tova kabisonaga yana abavehimeya ginamiyami tu ginahavaina. <sup>11</sup> Bana kevakeva manimaninina tuwaina gimiyami tu adamoya keke wayawaina gidamiyami-ma au tokikaiwabu adiveseveni adi yo'o kalivana. Tu aimo ginayemuna-havagi be bana tauna ginavehivehimeya tokikaiwabu anave'eita. Bana'e ma yana abavehimeya ginahavaini-yo au ginana ana agolaufofola ginanuhagana.

<sup>12</sup> Tu ana siko teni u'itana-ma au tokikaiwabu teni tu aimo keke hidavebutu hidavehivehimeya. Atu aimo abavehimeya hinavaina be bai sa'eyanaga againe tokikaiwabu amine bana kevakeva manimaninina buye hinavehimeya.

<sup>13</sup> Badi tokikaiwabu teni yadi nuwanuwa sa'eyana ada yadi faiwala kadu yadi abavehimeya kevakeva manimaninina againe hinasedamanena. <sup>14</sup> Yaubada yana Sifi kabi'ona againe hinalugaviya tu Sifi kabi'ona yana yo'o buye hinfaiwalahege-mo'edi, fa'ina Bana'e tovehimeya yadi Tovehimeya, tokikaiwabu adi Tokaiwabu. Boi tuwaina mena yana yo'o kalivai-dina gikovadi be giluwafadi ada badi yadi wa'atuvefa'ila himulimuliyena.” Au hidedemi tovenuwa'ata gikivetuvetunuku.

<sup>15</sup> Kadu'e tovenuwa'ata gigaheku gigayo,

“Gufa moya'aina agaidiya kwamayoku yamayamadadadi hivetogadi be u'itadi-ma ana nuwanuwa hidede amine. Gufa ma yo'o tulina tulina, adi loi tulina tulina, meyadi tulina tulina, yadi fafali tulina tulina. <sup>16</sup> Kevakeva manimaninina kadu ana siko teni u'itadi-ma kwamayoku yamayamadadadi hinavenikohiyedi. Yadi lokoloko moya'aina hinalemadi be konekonedu hinanuyabuyabudi. Muliya vidodi hina'ana tu luludi aiya hinakabudi. <sup>17</sup> Au hidede amine kwamayoku hinakivekoyodi fa'ina Yaubada yana nuwanuwa ase'asediya ahe gisena be yadi nuwanuwa sa'eyana yadi abavehimeya kevakeva manimaninina againe hisedamanena. Ada kwamayoku hinakivekoyodi-yo Yaubada yana gahe ginalakayemu velemo'ena. <sup>18</sup> Badi kwamayoku u'itadi-ma au melala lakahina babi ana tokikaiwabu matatabudi givehivehimeyedi.” Au hidedemi tovenuwa'ata gigaheku.

## 18

### *Yaubada miBabiloni ginaluyaweyawelidi.*

<sup>1</sup> Tu kwamayoku adi nuwanuwa vaita melala lakahina amine ga'itadi-yo kadu lobama ana tovenuwa'ata velugana lobama amine gihobuhobu'ela-ma ga'itana. Bana'e ma yana wa'abavehimeya lakahina ada yana mahalina ve'akinamanamalina babi matatabuna gituvemahalina. <sup>2</sup> Au aimo gavadi ginalakayemu-ma fa'ina gikova'awafatafata gigayo, Babiloni hida hima melala lakahina

hiluyawelina, hiluyaweli-'owona.

Medede againe Setani yana yo'o hive'abaga,  
balauma koyodi moya'aidi hivevadalauga  
kadu manuga koyodiyao itamatamatauhidi  
melalai-nadi ana autu'u hivaina.

<sup>3</sup> Babi ana tokikaiwabu tulina tulina  
yadi yo'o kalivai-dina buye'i

melalai-nadi ana nuwanuwa ita'italuvadigana  
nuwadi gi'abina, gi'abi-mo'ena.

Wa'ita, kwamayoku kaliva higayena be  
gufa laulaugina hiveyuni-yo givekwavakwava  
tu buye hi'udo'udo amine,

meda kaliva moya'aidi melalai-nadi againe  
udo tulina tulina agaidiya hihawahegedi.

MiBabiloni nuwanuwadi lakahina babi ana  
lokoloko

fa'ina fafali tulina tulina ana tonilokoloko  
hilukuluku'ela be kimone moya'aina againe

mani keke kabi'ona hivivaini-yo hikikaiwabu-  
mo'a.

Au hidedemi tovenuwa'ata kikaiwabuna gigahe.

<sup>4</sup> Gigahe-yo ago'ago velugana lobameya gikova-  
ma ganogalina gigayo,

Omi yaku yo'o melalai-nadi wanahegena,  
yadi dewa koyona keke badi buye wanahuluvini,

Vita koyo-mo'edi ganaveledi-ma  
keke nuwanuwaku omi wanunuhagadi.

<sup>5</sup> Wa'ita, yadi koyona hi'ive'ave'ahina

vaita gidalaka lobameya, ada

Yaubada yadi dewa baladi ginuwa-nunauyena.

Au hidedemi gahe ganogalina. <sup>6</sup> Kadu tove-  
matahiwadi agaidiya gigahe gigayo,

MiBabiloni yaku yo'o hikivekoyodi amine

meda badi kalivai-dina omi wanakivekoyodi.

Yadi koyona sa'eyana sa'eyana  
matahiwadi luhei luhei wanalaufata.  
Vita lakahina ana gowa hikidewedewena  
be yaku yo'o hiveyudi amine,  
meda gowai-nadi luhei wanakidewedewedi  
be badi hinayuyedi adi matahiwadi.

<sup>7</sup> Yadi kikaiwabu lakahina fa'ina hiselakalaka,  
au yadi selakalaka analaga amine  
aulolo tagiya lakahina wanaveledi.  
Gilubodadi be aulolo-dina hinanuhagadi  
fa'ina tova moya'aina taudiyao hikikilakahidi  
higayo, Ime tokikaiwabu, vita keke ana'ayauneni.  
Ime keke sikwasikwadiyao amine anatagitagiya.

<sup>8</sup> Hidedemi higawe fa'ina, aiyeta sa'eyanaga  
againa  
adi vita lakahi-mo'ena agaidiya ginalakayemu,  
alika tagiya loka.  
Au ai'ala'alata gina'ala-'owodi,  
fa'ina Yaubada Kaiwabu adi Tovematahiwadi  
amanadi Kaliya Fifiwalana.  
Au hidedemi kadu gawe ganogalina.

*Tonilokoloko Babiloni ana ivebwavi fa'ina hinanulaulukuhi.*

<sup>9</sup> Tu babi ana tokikaiwabu melalai-nadi  
ana dewa udo'udona kadu ana kikaiwabu  
hi'itavaina be buye hikoyo-ma melala  
gina'ala'alata-ma siyona hina'itana againe  
hinatagitagi hinalulaulukuhi. <sup>10</sup> MiBabiloni yadi  
aulolo yadi vediwe fa'ina tokikaiwabu-dina  
hinamatautave'ine be hinamidilauva hinakova  
hinagayo,  
Hoiyoi! Hoiyoi! Ho melala lakahina!



Ho Babiloni melala fifiwalana!

Bai sa'eyanaga againe adi matahiwadi hinuhagana.

Au hidedemi babi ana tokikaiwabu hinagahe.

<sup>11</sup> Tu babi ana tonilokoloko melala ana ivebwavi fa'ina hinatagitagi hinalulaukuhi hinagayo, “Melala a gibwavi. Keke tamo hakwadi gidamiyami-yo yada lokoloko gidakimoneni fa'ina kanavekoyokoyo. <sup>12</sup> Yada lokoloko ma gola siliva kabala yamuyamumu-'owogidi kadu bidi fatana lakahina, kaleko tulina tulina kwayakwayana likelikenana yabeyabelina wowobikabikana, higa wakalivadiyao adi vaigau. Kadu ai wamagana tulina tulina kadu ikilukiluma tulina tulina vaita manuwa ana vaigau fa'ina, gaitomai-dina tufona kevakeva halana againe hibubuna, kadu tufona ai fatana lakahina, tufona kofa, tufona kainumula, tufona kabala kwayakwayana hawahawaviyanina againe hibubudi. <sup>13</sup> Kadu yada lokoloko velugana ma gaitoma tulina tulina wamagana vaigau fa'ina, kadu vanedimodimo ana egana inisenisi mulo falanikisenisi, kadu oine, kadu bunama guwana ana egana olive againe hibubuna amanadi, kadu falawa be witi, kadu bulumakau be sifi, kadu hosi be waka abalulautaina. Kadu kaliva vevine vaita lokoloko amine akimokimonevedamanedi be kaliva adi agetoga fa'ina.” Au hidedemi tonilokoloko yadi lokoloko fa'ina hinagahe.

<sup>14</sup> Kadu vaita miBabiloni-mo'edi agaidiya hinagahe hinagayo, “Lokoloko tulina tulina nuwanuwami lakahina ma hiyawowola. Yami kikaiwabu yami giba ve'akinamanamalina gihavaina, gihavai-mo'ena. Au aimo

keke wanavai-havagiledi.” <sup>15-16</sup> Badi tonilokoloko lokoloko-dina melalai-nadi againe hikimokimonevedamane-di-yo hivewakali-vadiyao amanadi hinamidilauva miBabiloni yadi vediwe fa'ina hinamatautave'ine. Hinatagitagi hinalulaukuhi hinagayo, Hoiyoi! Hoiyoi! Ho melala lakahina! Boi ami vaigau haghagi-mo'ena, kaleko kwayakwayana likeliken a yabeyabelina, kadu gola, kabala yamuyamumu-'owogidi, bidi fatana lakahina wavivigauyedi. Hidedemi ami ita ve'akinamanamalina tu mena yami kikaiwabu gavatubuga ma bai sa'eyanaga againe giyawowola. Au hidedemi tonilokoloko hitagilulauhawa.

<sup>17-18</sup> Tu waka ana tovemadu kadu toyage, badi waka ana tofaisewa kadu badi fatadi fa'ina hivetobayauma-ma hinamidilauva melalai-nadi gina'ala'alata-ma siyona hina'itana againe hinakova hinagayo, “Hida hima melala ma keke tamo melala amine, keke-mo'a.” <sup>19</sup> Au hitagitagi hilulaukuhi lokoloko hiluyauyaula hikovakova higayo, Hoiyoi! Hoiyoi! Ho melala lakahina! Toniwaka moya'aidi melalai-nadi againe yadi lokoloko hi'ali'aliyeni-yo hivewakalivana. Au bai sa'eyanaga againe adi lauyawela hinuhagana. Au hidedemi waka ana kaliva hitagilulauhawa.

*Babiloni ana matahiwadi gavatubuga!*

<sup>20</sup> Tu tamo hakwadi gigahe gigayo, Mena melala ana matahiwadi givaina fa'ina

omi tomiyalobama wanavemwamwala.

Kadu omi Yaubada yana yo'ogaga

kadu omi afositolo be falofita  
moya'aimi wanavemwamwala.

Wa'ita, miBabiloni omi hikivekoyomi

fa'ina Yaubada badi agaidiya gilaufata.

<sup>21</sup> Tu lobama ana tovenuwa'ata fifiwalana  
kuga abokakaina vaita kugawauwaula amine  
gifewana be lehageya gihegehobuyena gigahe  
gigayo,

Kuga yaku wafaiwala lehageya gahegehobuyena  
be aimo keke wana'itani amine,

meda melala lakahina Babiloni

yadi wafaiwala hinaluyawelina be aimo keke  
wana'itani.

<sup>22</sup> Hida melala ana abavemwamwala  
ginahavaina.

Au keke tamo vemwamwala ana ago'ago  
kananogalini,

modawa kulele hiulega agodi ginahavaina,

kadu keke kananogali-havagileni.

Tofaisewa yadi faisewa tulina tulina

keke hina'abi-havagileni.

Nila ana a'oli'oli butuna

aimo keke kananogali-havagileni.

<sup>23</sup> Lamufa mahalina melalai-nadi againe

aimo keke kana'ita-havagileni.

Badi nagivagu yadi wavemwamwala agodi

kadu keke kananogali-havagileni.

Hida melala ana tonilokoloko ma boi

vaita babi ana kaliva kikaiwabudiyao amine.

Yo'o tulina tulina kalivai-dina

yana alavedivedigaga againe ginuwa'abiyedi.

<sup>24</sup> Kadu hida melala kalivai-dina

Yaubada bonana ana to'awatalatalaina  
 be yana kaliva mahamahalidiyao  
 hiluve'alikadi be dayagidi gimadu.  
 E, gaveyao moya'aidi fafali tulina tulina agaidiya  
 Yesu Keliso fa'ine alika hinuhagana,  
 medema vaita dayagidi Babiloni againe  
 gidamadu.  
 Au hidedemi tovenuwa'ata fifiwalana gigahe.

## 19

### *Yoni kweli lakahina lobameya ginogalina.*

<sup>1</sup> Tu Babiloni ana lauyawela ga'ita-yo butuna  
 lakahina ganogalina, vaita yo'oyo'o lakahi-mo'edi  
 lobameya hikovakova higayo,  
 Aleluya! Ada kibababala Yaubada againe  
 give'inuba,

Bana'e kikaiwabuna kadu fifiwalana.

<sup>2</sup> Yana laufata velemo'ena kadu tunutunugina.

Mena melala vaita kwamayoku yamaya-  
 madadadi amine

yadi dewa udo'udona agaidiya gilaufata.

Dewai-nadi againe tomiyababi hinuwa'abiyedi.

Tu yana tofaisewa hiluve'alikadi-ma dayagidi gi-  
 laufata.

Au hidedemi hikova. <sup>3</sup> Kadu hikova-havagilena  
 higayo,

Aleluya! Yaubada kanadavadavana

fa'ina melalai-nadi siyona gilakalaka-vagata.

<sup>4</sup> Au tomiyalobama adi tonagona tuweniti-fowa kadu gaitoma wayawaidi fifiwaladiyao adivefowa Yaubada againe hi'ibo'ula-mo'a be hihawadavadavana, Bana'e yana didiga'u'uya givetogana amanadi. Kadu badi hikovakova higayo, Aleluya! Yama nuwanuwa ehe hidedemi.

<sup>5</sup> Tu ago'ago sa'eyana Yaubada yana didiga'u'uya giyemu gigayo, Omi Yaubada yana tofaisewa kadu omi Bana'e wamatausena lakahimiyao kadu kabi'omiyao yada Yaubada wanadavadavana.

<sup>6</sup> Hidedemi gigahe-yo butuna lakahina vaita yo'oyo'o lakahi-mo'edi agodi amine ma ganogalina. Butudi vaita gufa lakahina gihobuhobu kadu atala gihegehegena toyogina ma amine. Badi hikovakova higayo, Aleluya! Yada Yaubada Kaiwabu givebutu givehivehimeya, Bana'e Tofaiwalamo'a.

<sup>7</sup> Kanavemwamwala kanagakahikahi, au Bana'e kanakivekaiwabuna. Fa'ina yana Sifi kabi'ona yana nagi ana tova a gilakayemu, ada yana kwamayoku ma higa Yesu ana tovetumagana moya'aidi nagi fa'ina ahe gikidewadewa.

<sup>8</sup> E, Yaubada kaleko kwayakwayana givelena, yegayegana kadu ve'akinamanamalina. Au hidedemi yo'oyo'o hikovakova.

[Mena kaleko kwayakwayana ana nuwanuwa ma Yaubada yana kaliva mahamahalidiyao yadi dewa yegayegana.]

9 Tu bana tovenuwa'ata gigaheku gigayo, “Hidedemi u'etoladini. Gaveyao Yaubada yana Sifi kabi'ona yana nagi ana avemwamwala againe giyowanidi, medema yadi vemwamwala gavatubuga!” Au hidedemi gigahe. Kadu gigayo, “Mena gahe-nadi au Yaubada yana gahe velemo'ena.”

10 Hidede amine gigahe-yo tovenuwa'ata agene ga'ibo'ula-mo'a higa gadahawadavadavana. Atu gihawataku gigayo, “Auwe, keke unahawadavadaku. Iya'eku Yesu yana tofaisewa anafaiweya kadu o'eni kadu tobohiyamomo, omi nuwanuwa velemo'ena Yesu gi'awatalatalainena be againe waluluve'avina-ma kalivai-mina. Keke iya unahawadavadavaku, au Bana Yaubada. Unogali! Yaubada yana nuwanuwa velemo'ena Yesu gi'awatalatalainena-ma meda Yaubada bonana ana to'awatalatalaina tuwaina Yesu nunune hinanauna kadu adamoya nunune hinanauna.”

*Kaliva ana egana Bona hosi kwayakwayana againe*

*giyage-ma kahihina.*

11 Tu tovenuwa'ata gilukahihi gihavaina, lobama ana wanafali yaulyaugina ga'itana, ada mene matakuya hosi kwayakwayana gimidi tu Bana Kaliva kwaune gihiyotoma ana egana Todibumuhiga kadu Togahe velemona. Yana abavehimeya tunutunugina againe gilulugaviya kadu kaliva agaidiya gilulaufata. 12 Matana give'akinamanamalena

vaita ai'ala'alata amine kadu u'une badau kikaiwabuna moya'aina hidadauda. Kadu Bana wowone egana kilukilumina gidadauda, eganai-nadi keke tamo hakwadi gidahalamaneni tu Bana anakaibe gihalamanena. <sup>13</sup> Kaleko againe givaigau-ma dayaga lakahina gifotana, ada Bana ana egana Bona higa Yaubada bonana amanadi. <sup>14</sup> Bana Bona wai ginagona tu badi lobama ana tolugaviya adi yo'o adi yo'o wai himulina. Hosi kwayakwayadiyao agaidiya hiyage ada kaleko kwayakwayana yegayegana kadu ve'akinamanamalina againe hivaigau. <sup>15</sup> Bana Bona awane fetu sinasinahina giyemu be medema againe yo'o tulina tulina ginalaulaudi-yo agevavane ginasedi. E, yana fuluma kainumula againe ginavehivehimeyedi. Kaliva kelefi abavagafuwafuwa againe hivagafuwafuwana amine, meda Yaubada yana ila'a ana abanauhaga againe Bana Bona Tauna tokoyona ginavagafuwafuwadi be Yaubada yana ila'a lakahi-mo'ena hinanuhagana. <sup>16</sup> Ada ana aikeva kadu ubuna againe egana kilukilumina gidadauda. Egana hidede amine.

TOKIKAIWABU ADI TOKAIWABU  
TOVEHIMEYA ADI TOVEHIMEYA

*Yaubada nibaineyao adi agolaufofola hinuhagana.*

<sup>17</sup> Kadu'e ga'eno'ita tu lobama ana tovenuwa'ata kauwana againe gimidimidi-ma ga'itana. Bana manuga moya'aidi lobama hinafane hiyaveyavega-ma agaidiya

gikova'awafatafata gigayo, “Moya'aimi wa'ela be Yaubada yana abutu fa'ina wanavaga'auta. <sup>18</sup> Abutu-nadi againe kaliva moya'aidi gaviya againe hina'alika-ma vidodi wana'au'ana, tokikaiwabu tolugaviya adi togiyomatana kikaiwabudiyao buye'i, kadu hosi adi kaliva buye'i, e kaliva moya'aidi lakahidiyao kadu kabi'odiyao, agetoga adi tovehimeya buye'i vidodi wana'au'ana.” Au hidedemi tovenuwa'ata gikova.

<sup>19</sup> Tu bana kevakeva manimaninina kadu babi ana tokikaiwabu moya'aidi adi tolugaviya adi yo'oyo'o buye'i gaviya fa'ina hivaga'auta-ma ga'itadi. Hivaga'auta higa Bana hosi kwayakwayana kwaune gihiyoto-ma kadu yana tolugaviya hidalugaviyadi. <sup>20</sup> Atu Bana Bona yana yo'o buye'i nibaidiyao hifaiwalahegehege-mo'edi, ada bana kevakeva manimaninina kadu falofita ve'alololona hikive'avidu. Mena falofita boi kevakeva manimaninina loseyanina amine iya'iyaya yauyaulowogidi gififaisewadi be medema againe kaliva kevakeva manimaninina ana iya'iyaya hivaina, kadu ana ikilukiluma hihawadavadavana-ma ginuwa'abiyedi. Au adi'iselu hikive'avidu-yo wayawaidi muna gaitoma yagoyagona alamatafailina giyabeyabela-ma againe hihegehobuyedi. <sup>21</sup> Tu adi tolugaviya moya'aidi Kaliva yana fetu awane giyemu-ma againe yadi alika hinuhagana. Kalivai-nadi hosi kwayakwayana kwaune gihiyoto. Tu au hi'alika-'owoga ada manuga moya'aidi hi'ela vidodi hi'au'a hi'au'a tu hi'a-



wayoga.

## 20

*Yaubada Setani giyogona be malamala wani tausani ginamiyami.*

<sup>1</sup> Tu gaviya gihavaina againe lobama ana tovenuwa'ata sa'eyana lobama amine gihobuhobu'ela-ma ga'itana. Kahu Tunugivadavada'aina ana kihi bana nimane gidadauda kadu bulava kainumula lakahina gi'abina.  
<sup>2-3</sup> Au bana wayo'o abokakaina gikive'avina digo giyogona tu Kahuya gihegehobuyena au Kahu gifalidonena be medede againe malamala wani tausani (1,000) agaidiya balauma buye hinamiyami. Bana wayo'o ma hida hima oloto tuwai-lokalokana gimiyami-ma ana egana Diyabolo yo Setani. Au gifalidonena tu keke tamo hakwadi anafaiweya ginayauni be higa keke anafaiweya tomiyababi kadu ginanuwa'abiyedi. Malamala wani tausani ginahavaidi-yo Yaubada ginahawahegena be ginalakayemu ada tova kabisonaga yauyaugina ginamiyami.

<sup>4</sup> Kadu'e ga'eno'ita tu didiga'u'u moya'aina ga'itadi, ada badi Yaubada abavehimeya givededi be hinavedewayauga-ma didiga'u'u agaidiya hivetogadi. Kadu kaliva aluwadi ga'itadi, Yesu fa'ine hi'awatalatalaina kadu Yaubada bonana againe himiyave'avina fa'ina boi hiluve'alikadi amanadi. Bana kevakeva manimaninina kadu ana ikilukiluma keke hidahawadavadavadi, ada yana iya'iyaya deba'aidiya o i'atagidiya keke

hidavaini. Hi'alika tu Yaubada gihawahegedi be yawaidi hinuhagana ada malamala wani tausani (1,000) agaidiya Keliso buye hivehivehimeya. <sup>5</sup> Hidevama mididi-havagi nagona atu to'alika velugadiyao ma malamala wani tausani ginahavaidi-yo hinamididi-havagi. <sup>6</sup> Badi nagona hinamididi-havagi ma Yaubada yana kaliva mahamahalidiyao ada yadi wavemwamwala hinamiyami. Aimo alika anavelu kaliva koyodiyao ai'ala'alata againe hinanuhagana ana toveya, badi Yaubada yana kaliva ma kadu keke-mo'a aulolo hinanuhagani. Au Yaubada kadu Keliso ana hawadavadava ana tofaisewa hinamiyami, ada malamala wani tausani agaidiya Keliso buye hinavehivehimeya.

*Yaubada Setani ana agolaufofola againe gihege-vagahina.*

<sup>7</sup> Tu malamala wani tausani (1,000) ginahavaidi-yo Yaubada Setani ginahawahegena be ana aba'aiyogona higa Kahu Tunugivadavada'aina againe ginahobu. <sup>8</sup> Ginahobu-yo ginana babi matatabuna ana fafali agaidiya yo'o tulina tulina ginanuwa'abiyedi be gaviya fa'ina ginavaga'auhidi. Yo'oi-dina adi loi luhei, sa'eyana adi egana Gogi kadu sa'eyana Megogi. Ada yo'oi-dina adi kilagalaga vaita taliya ana makama amine. <sup>9</sup> Badi kalivai-dina hinatauya hinalulaudeli babi matatabuna hinave'iyogiyogina be Yaubada yana yo'o yana melala nuwanuwana lakahina amanadi

---

**20:6:** Ha 9:1 Ha 12:9, Yu 1:6  
Dan 7:27 Ha 2:11, 1Fi 2:9

**20:6:** 1Ko 6:2, Ha 6:9, 13:16-17,

hinabodaffidi. Atu ai'ala'ala'ata lobama amine ginahobu'ela be gina'alahi-'owodi. <sup>10</sup> Kadu bana Setani kaliva ginuwa'abiyedi-ma Yaubada yana vehimeya againe muna lakahina gaitoma yagoyagona alamatafifailina giyabeyabela-ma againe hinahegehobuyena, munai-nadi againe boi kevakeva manimaninina kadu falofita ve'alololona badi adi'iselu hihegehobuyedi. Uyadayada be bogi medede againe hinavedivediwe tova inaga inaga keke ana abalauyabu.

*Yaubada to'alika ginavedewayaugidi.*

<sup>11</sup> Kadu'e ga'eno'ita tu didiga'u'u lakahina kwayakwayana ga'itana kadu ana Kaliva ga'itana. Bana'e didiga'u'uya givetogana amanadi ana ita kikaiwabu-mo'ena kadu ve'akinamanamalina fa'ina babi be lobama vaita hida'ota au hiyawowola. <sup>12</sup> Kadu to'alika ga'itadi, lakahidiyao kadu kabi'odiyao didiga'u'u wamagigine himidimidi, ada au Yaubada yana vehimeya againe buki hikiyavalidi. Buki-dina agaidiya badi kaliva moya'aidi yadi dewa matatabuna valeyana hi'etoladina be medema againe Yaubada adi laufata ginafolakena. Kadu buki velugana hikiyavalina, buki-nadi againe badi yawai-vagahidi Yaubada givedi-ma adi egana hidadauda. <sup>13</sup> Au gaveyao lehageya hitowa'alika kadu gaveyao avaleyaya hi'alika, medema Yaubada yana vehimeya againe alika ana abageya hitauya be himididi-havagi. Au kaliva sa'eyana sa'eyana Tovedewayauga matane

hi'ela himidi be yadi dewa yadi dewa amine adi laufata giveledi. <sup>14</sup> To'alika givedewayaugidi gihavaina, alika kadu alika ana abaga muna lakahina giyabeyabela-vagata ma againe hihegehobuyedi be gihavaidi. Munai-nadi au alika anavelu. <sup>15</sup> Tu yawai-vagata ana buki againe kaliva adi egana hilele-hagihagiyena, ada gava kaliva ana egana Yaubada keke gida'etoladini, medema muna lakahina giyabeyabela-vagata ma againe hihegehobuyena.

## 21

### *Lobama ivaguna kadu babi ivaguna kahihidi.*

<sup>1</sup> Kadu'e ga'eno'ita tu lobama ivaguna kadu babi ivaguna ga'itadi, fa'ina lobama tuwaina be babi tuwaina hiyawowola kadu lehaga gihavaina. <sup>2</sup> Kadu Bana Yaubada yana melala mahamahalina ana egana Yelusalema ivaguna Yaubada againe gitauya be lobama amine gihobuhobu'elama ga'itana. Ana ita hagihagi-mo'ena vaita kwamayoku yana nagi fa'ina gidavevigauni be gidana yana kaliva againe. <sup>3</sup> Ada ago'ago sa'eyana Yaubada yana didiga'u'uya giyemu-ma ganogalina gikova'awafatafata gigayo, “Wa'ita, adamoya Yaubada kaliva agaidiya give'abaga ada Bana badi buye hinamiyami. Badi yana yo'ogaga amine hinamiyami, ada Yaubada Tauna ginave'alunedi be Bana badi yadi Yaubada ginamiyami. <sup>4</sup> Matailudi sa'eyana sa'eyana ginaluhegehegedi. Aimo keke tamo alika o

ase'u'aulolo o tagiya o aulolo, fa'ina mena vitai-dina a gihavaidi kadu babi tuwaina ana gaitoma moya'aina a hiyawowola.” Au hidedemi gigahe.

<sup>5</sup> Tu Bana didiga'u'uya givetogana-ma gigahe gigayo, “Wa'ita, adamoya gaitoma moya'aina gakikive'ivagudi.” Kadu iya agaikuya gigahe gigayo, “Mena gahe-nadi una'etoladina, fa'ina gahe-nadi au velemo'ena ada omi kaliva amifaiweya wanavetumaganena.”

<sup>6</sup> Kadu gigahe-havagileku gigayo, “Ahe'! Yaku nuwanuwa matatabudi ahe galuyabudi. Iya inubane kadu tabone, Iya Abave'inuba kadu Abalauyabu. Gava kaliva agona gitaina, medema yawai-vagata ana guya againe ganaveyuna ada gufai-nadi keke wafatana. <sup>7</sup> Hai kaliva Iya fa'ikuya yana atuvefa'ila againe gifaiwala-mo'a, ana du'u gawonadabedabena-ma ginanuhagana, ada Iya yana Yaubada amine ganamiyami tu bana kadu natuku amine ginamiyami. <sup>8</sup> Atu gaveyao keke Iya fa'ikuya hida'atuvefa'ila higa yadi wamatauta fa'ina keke Iya fa'ikuya ve'umagigi againe hidahawahegedi, badi keke hidavetumaganeku, badi dewa koyodi Yaubada givenikohiyedi-ma agaidiya hihawahegedi, badi toluve'alika kadu to'udo, badi kwelikweli tulina tulina hi'abina, badi mali yaubada agaidiya hi'odu'odu kadu tove'alololo moya'aidi, medema kalivai-dina adi loi aulolo keke kabi'ona hinanuhagana. Badi yadi abaga ma muna lakahina ai'ala'alata kadu gaitoma yagoyagona alamatafailina againe giyabeyabela amanadi againe hinavedivediwe. Mena vedivediwe ana egana alika anavelu.” Au hidedemi Yaubada

gigahe.

*Yoni Yelusalema ivaguna ana ita gilukahi-hiyena.*

<sup>9</sup> Tu tovenuwa'ata adiveseveni yadi nau'a seveni vita koyo-mo'edi seveni agaidiya himaga be hibihiwadi-ma adi yo'o kalivana agaikuya gi'ela gigaheku gigayo, “U'ela be kana kwamayoku nagivagu ganavehawale, bana Yaubada yana Sifi kabi'ona vavinena amanadi.”

<sup>10</sup> Gigahe-yo Yaubada Alu'aluwana giluvaiyeku be oya tunugi-mo'ena kabune gilakaveku, ada melala mahamahalina Yelusalema Yaubada againe gitauya be lobama amine gihobuhobu'elama givehawaleku. <sup>11</sup> Melalai-nadi Yaubada yana kaiwabu againe give'akinamanamalena, ada ana ita vaita kabala yamuyamumu-'owogina amine, e kabala vaita kelasi amine ve'akinamanamalina ana egana diyasifa. <sup>12</sup> Melala mena kabala ve'akinamanamalina agaidiya hi'alana, alai-nadi tunugi-mo'ena kadu ana abaluku tuwelo ada abaluku sa'eyana sa'eyana agaidiya lobama ana tovenuwa'ata sa'eyana sa'eyana himidimidi adi yo'o tuwelo. Ada abaluku agaidiya mi'sileli adi yo'o tuwelo adi egana kilukilumina hidadauda.

<sup>13</sup> Lauhanaga amine abaluku tohiye, mwaigugu amine kadu abaluku tohiye, bolimana amine kadu abaluku tohiye, yavalata amine kadu abaluku tohiye. <sup>14</sup> Ada melala ana ala ana avalalakata ma kabala lalafana beyabeyana tuwelo, ada medema agaidiya Yaubada yana

Sifi kabi'ona yana afositolo tuwelo adi egana hidadauda.

<sup>15</sup> Tu bana lobama ana tovenuwa'ata iya buye alulukahihi-ma aiwala vaita aba'etowava amine gola againe hibubuna-ma gi'abina higa mena aba'etowava againe melala-mo'ena kadu ana abaluku kadu ana ala gida'etowavana.

<sup>16</sup> Ada melala ana ita hidede amine higa yana bala yana laka au sa'eyana. Au tovenuwa'ata yana aba'etowava againe melala gi'etowavana, ada yana bala yana laka yana tunuga ana etowava au sa'eyana ma ginuhagana, badi miGilika yadi etowava amine 12,000 sitediya higa vaita 2,800 kilomita amine.

<sup>17</sup> Ada melala ana ala gi'etowavana, ada ime miYuda yama etowava amine tovenuwa'ata gi'etowavana-ma ala ana tunuga 144 kiubiti higa vaita 64 mita amine.

<sup>18</sup> Mena melala gola hagihagi-mo'ena againe hibubuna, golai-nadi vaita kelasi lu'anuanunuyana amine, ada ana ala kabala vaita kelasi amine ve'akinamanamalina ana egana diyasifa againe hibubuna.

<sup>19-20</sup> Ada melala ana ala ana avalalakata kabala yamuyamumu'owogina tulina tulina agaidiya hivevigauna, ada kabalai-dina adi egana hidede amine.

Avalalakata nagona ma diyasifa againe hivevigauna

ana ita ma vaita kelasi ve'akinamanamalina amine.

Anavelu ma safaiya, matamatagina vaita lobama matamatagina amine.

Anaveto ma agate, matamatagina vaita isisi'u amine.

Anavefowa ma emelodi, matamatagi-mo'ena.

Anavefaifi ma onikisi, lugologohina yabeyabelina

kadu kwayakwayana.

Anavesikisi ma kaneliyani, yabeyabelina.

Anaveseveni ma kilisolaiti, yagoyagona.

Anave'eita ma beleli, matamatagina vaita lehaga matamatagina amine.

Anavenaeni ma tofasi, yagoyagona tu lu'anuanunuyana.

Anaveteni ma kilisofesi, matamatagina tu ve'akinamanamalina.

Anave'ileveni ma diyasito, likelikena.

Anavetuwelo ma ametisi, likelikena tu lu'anuanunuyana.

Hida kabalai-dina tufona ve'akinamanamalina kadu tufona lu'anuanunuyana. <sup>21</sup> Melala ana abaluku tuwelo ma bidi lakahidi tuwelo agaidiya hibubudi higa abaluku sa'eyana bidi sa'eyana againe hibubuna. Bidi-dina ve'akinamanamalidi fatadi lakahina adi egana feli. Melala ana eda gola haghagi-mo'ena againe hibubuna ana ita vaita kelasi lu'anuanunuyana amine. Melala ana ita au hidede amine.

<sup>22</sup> Tu keke tamo manuwa-tafalolo melalai-nadi againe gada'itani, fa'ina Yaubada Kaiwabu Tofaiwala-mo'a kadu yana Sifi kabi'ona kaliva buye hive'abaga-yo adifata hihawadavadava-mo'edi. <sup>23</sup> Melalai-nadi ana mahalina keke kauwana o vaikohi againe gidamahalini. Au Yaubada yana mahalina ve'akinamanamalina melala gituvemahalina kadu yana Sifi kabi'ona



vaita melala ana lamufa amine. <sup>24</sup> Kadu mena mahalina babi ana yo'o tulina tulina yadi mahalina ada medema againe hinamiyami. Ada babi ana tokikaiwabu melalai-nadi againe yadi kikaiwabu hina'ali'aliyena. <sup>25</sup> Medede againe keke tamo mala gidabogi fa'ina, keke tamo tova ana abaluku hinafalini. <sup>26</sup> Yo'o tulina tulina yadi wave'amohimohina yadi kikaiwabu melalai-nadi againe hina'ali'aliyena. <sup>27</sup> Tu keke tamo gavadi bwanebwanebwanena melalai-nadi againe ginaluku, keke-mo'a. Kadu keke tamo to'udo o tove'alololo hinaluku, keke-mo'a. Au badi adi egana Sifi kabi'ona yana buki againe gi'etoladina be yawai-vagahidi giveledi-ma, badi'iyagoga hinaluku.

## 22

### *Yawai-vagata ana gufa fa'ina gilukahihi.*

<sup>1-2</sup> Tu lobama ana tovenuwa'ata yawai-vagata ana gufa givehawaleku, gufa fo'ana kwayakwayana ada Yaubada kadu yana Sifi kabi'ona yadi didiga'u'uya giyemu be melala ana eda lakahina hinafane ginanauna. Gufa fafaline fafaline yawai-vagata ana ai himidimidi, ada ai-dina malamala sa'eyana sa'eyana ana vaikohi hingenegene hiyoyoyo be giboyaboyala ada malamala ana vaikohi tuwelo agaidiya hi'i'aikolu. Ada gaveyao guwanai-nadi againe hi'au'a-ma yawai-vagahidi hinunuhagana. Tu ai lukumidi agaidiya ma yo'o tulina tulina yadi yamumu hinunuhagana. <sup>3</sup> Boi Yaubada babi tuwaina gi'alatabutabuyena

tu adamoya hida yana melala againe keke tamo gavadi againe alatabutabu gidadauda. Au melala hinagene Yaubada kadu yana Sifi kabi'ona yadi didiga'u'uya hivetogadi, ada yana tofaisewa ana hawadavadava againe hinafifaisewa. <sup>4</sup> Bana ana egana deba'aidiya ginadauda ada tova moya'aina badi Bana magigina hina'ita'itana. <sup>5</sup> Uyuyu gihavai-mo'ena. Au Yaubada Kaiwabu Tauna yadi mahalina fa'ina, keke nuwanuwadi lamufa ana mahalina o ka'i kauwana ana mahalina. Ada badi'iyao Yaubada buye hinavehivehimeya tova inaga inaga keke ana abalauyabu.

*Yesu yana yewa'ela fa'ina.*

<sup>6</sup> Tu tovenuwa'ata gigaheku gigayo, “Hida gahegahe ahe u'etoladina-ma au gahe velemono'ena ada omi kaliva amifaiweya wanavetumaganena. Tuwaina Yaubada Kaiwabu Alu'aluwana bonana ana to'awatalatalaina giluvaiyedi-yo yana venuwa'ata hi'awatalatalainena. Meda adamoya yana tovenuwa'ata gi'iveninisena be higa gavadi gavadi tova kabisona makewa'e hinalakayemu, medema Bana ana agetoga agaidiya ginahawavemogatalena.” Au hidedemi tovenuwa'ata gigaheku.

<sup>7</sup> Tu Bana Yesu ma gigahe gigayo, “Wanogali! Iya ganamaduyewa'ela. Hida buki againe gavadi gavadi aimo hinalakayemu-ma fa'idiya gavenuwa'ata-vagahimi. Omi gaveyao bonaku wanavenogalena, medema yami vemwamwala gavatubuga!”

8-9 Tu iya'eku Yoni ma gaitomai-dina ganogalidi kadu ga'itadi-ma kalivai-kuna. Ada ahe ganogalidi kadu ga'itadi-yo lobama ana tovenuwa'ata givehawaleku-ma agene ga'ibo'ulamola higa gadahawadavadavana tu gihawataku gigayo, “Auwe, keke unahawadavadavaku. Iya'eku Yesu yana tofaisewa anafaiweya kadu o'eni kadu tobohiyamomo, higa Yaubada bonana ana to'awatalatalaina kadu gaveyao moya'aidi hida buki ana gahegahe hi'ita'itave'avina amanadi. Keke iya unahawadavadavaku, au Bana Yaubada unahawadavadavana.”

10 Kadu gigaheku gigayo, “Yaubada yana venuwa'ata gigaheye-vagahina be hida bukiya gidadauda-ma keke unasevauyeni. Au unahawavemogatalena fa'ina gaitomai-dina hinalakayemu-ma adi tova ahe giluve'eda'ufo. 11 Yesu auhe'ama ginayemaunida fa'ina gaveyao adamoya hihuluhuluva koyona, au tovai-nadi kadu aimo hinahuluhuluva koyona. Gaveyao adamoya ase'asedi bwanebwanebwanenena, au tovai-nadi kadu aimo bwanebwanebwanenena. Tu gaveyao adamoya hihuluhuluva yamumuna, au tovai-nadi kadu aimo hinahuluhuluva yamumuna. Kadu gaveyao adamoya yadi dewa mahamahalina, au tovai-nadi kadu aimo yadi dewa mahamahalina.”

12 Tu Bana Yesu kadu gigahe gigayo, “Wanogali! Iya ganamaduyewa'ela. Iya laufata gana'aliyena ada kaliva sa'eyana sa'eyana yadi dewa yadi dewa amine adi laufata ganaveledi. 13 Iya'eku inubane kadu tabone, Iya wai ganagona kadu wai gamulina, Iya Abave'inuba kadu Abalauyabu.”

Hidemi Yesu gigahe.

<sup>14</sup> Tu gaveyao nuwahinagedi ana vaigau Sifi kabi'ona dayagine hikorakolana be gikwaya-mo'ena, medema yadi vemwamwala gavatubuga! Au adifaiweya abaluku againe hinaluku be Yaubada yana melala againe hinamiyami, ada Yaubada ginahawahegedi be yawai-vagata ana ai againe hina'au'a. <sup>15</sup> Tu melalai-nadi kwaune kaliva koyodiyao hinamiyami, badi kwelikweli tulina tulina hi'abina, to'udo toluve'alika, badi mali yaubada agaidiya hi'odu'odu kadu gaveyao moya'aidi nuwanuwadi ve'alololo ada tova moya'aina hiveve'alololo, medema kalivai-dina adi loi keke adifaiweya hinaluku.

<sup>16</sup> Tu kadu Yesu gigayo, “Iya Yesu yaku tovenuwa'ata ahe ga'iveninisena be hida gaitomai-dina omi tovetumagana ami yo'oi-mina agaimiya ginahawavemogatalena. Iya Devida bwanenena, bana yana yo'o agaidiya gatubuyemu. Iya higa Iyauwahala ve'akinamanamaliku.”

<sup>17</sup> Tu Yaubada Alu'aluwana kadu yana Sifi kabi'ona vavinena higahegahe higayo, “Wa'ela.” Kadu hai kaliva hinavenogala, medema gilubodadi be meda hinagahe hinagayo, “Wa'ela.” Hai kaliva nuwanuwana lakahina yawai-vagahina ginanuhagana vaita agona gidataina amine, medema gida'ela yawai-vagata ana gufa gidavai-kawowona.

*Yoni hida buki-nadi fa'ina givenuwa'atada.*

18 Tu iya Yoni ganagahe. Bana Yaubada yana venuwa'ata gigaheye-vagahina be hida buki againe gidadauda. Omi buki ana gahegahe wananogalina-ma hidede amine gagahevagadonemi. Hai kaliva tauna yana nuwanuwa hida buki ana nuwanuwa buye ginave'atutamo'aina, Yaubada mena kaliva ana matahiwadi kadu vita koyo-mo'edi hida buki gilukahihiyedi-ma buye ginave'atutamo'aina.  
 19 Meda hai kaliva Yaubada yana venuwa'ata hida bukiya gidadauda-ma ana nuwanuwa tufona ginavaihegena, Yaubada mena kaliva ana du'u ginavaihegena be keke yana melala mahamahalina againe ginamiyami kadu keke yawai-vagata ana ai againe gina'a, gaitomai-dina hagihagidi hida buki gilukahihiyedi amanadi. Au hidedemi Yoni gigahevagadona.

20 Tu Yesu hida hawavemogatala gi'alakakilina-ma, gigahe gigayo, “Taumadi ganamaduyewa'ela.”

Ika, Kaiwabu Yesu udamaduyewa'ela. Yama nuwanuwa ehe hidedemi.

21 Omi Yaubada yana kaliva moya'aimi Kaiwabu Yesu yana nuwadogeya wanamiyami. Ehe hidedemi.

Tamama lobameya umimiyami,  
 a egana mahamahalina anave'amohimohinena.

Ya abavehimeya ana tova gidalakayemu  
 ase'asemeya.

Ya vehimeya lobameya hi'ita'itave'avina amine  
 meda ime babiya ada'ita'itave'avina.



**YAUBADA BONANA VEYAO IVAGUNA Bona  
Iduna  
The New Testament in the Iduna Language of Papua  
New Guinea  
Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 11 Nov 2022 from source files dated 22 Nov 2019

73458371-ad55-5c77-8b6b-5eca8d58f667